

燕行紀

乾





燕行紀

徐浩修著 四卷 國朝

書中 著意 依 乾隆 國朝


八十 賀 行 名 劉 德 律 律 律 律

或 有 名 曰 此 子 子

少 月 廿 五 日 江 城 早 午 人 連 雨

月 十 月 廿 五 日 同 地 園 中 十 八 日 記

卷 一





燕行紀卷一

起鎮江城至熱河

乾隆庚戌八月十三日即八旬萬壽節也進賀使昌城尉  
黃仁黈副使禮曹判書徐浩修書狀官弘文館校理李  
百亨以五月二十七日辭陞上引見于誠正閣諭曰  
皇帝八旬萬壽節比他年尤別故差遣卿等進賀正當  
暑雨遼瀋道路必然艱險慎旃往還可也臣浩修對曰  
朝野顙祝邦慶之時臣以近密之列行將半年離違  
文陛區區下情不勝耿耿上曰今年元正福字宸翰

頒降實屬曠古之典卿等到燕後如見禮部尚書侍郎  
須以感頌銘鏤之意或言及或書示俾即導達於天聽  
可也臣仁黜對曰象譯華傳語終未分明搆出小篇文  
字以示似好矣臣浩修曰書示勝於言及敢不竭力奉  
行期於導達仍命臣浩修退待於內閣少頃領籤李  
興潤擎御製宣賜題曰皇帝八旬萬壽節特遣專使  
進賀拜表日書贈副价詩曰此路重穿薊柳烟乾隆丙  
申十一  
月臣以謝恩副使赴歸期應在鴈賓前人間五福君先  
燕丁酉三月復命數有意行叅萬壽筵繭紙微墨雲漢昭回異數也至



寶也到燕京裝以錦軸玉籤還朝後奉安于御書閣  
順治乙酉因勅諭並元朝冬至聖節歲幣為一行名曰  
冬至使每年一遣謝恩奏請進賀等使隨事差送而冬  
至使以正二品副使以正三品擬望謝恩等使以正一  
品副使以從二品擬望今番則八旬聖節不宜循常故  
差送專使進賀先具由移咨禮部本年三月別遣賫咨  
官張瀛又乾隆御製詠我國使有云禮義國原開賦詠  
上元帖子句當增有云覬謁應來能句入大臣據此奏  
請進賀副使勿拘常格文任中差送余以禮曹判書藝

文提學首擬蒙點

聖節進賀表文咨  
文各一度方物黃

細苧布一十匹白細苧布二十匹黃細綿紬三十匹紫  
細綿紬二十匹白細綿紬二十匹龍文簾席二張黃花

席二十張滿花方席二十張雜彩花席二十張獺皮二  
十張白綿紙一千四百卷粘陸張厚油紙一十部福字

宸翰頒降謝恩表文咨文各一度方物黃細綿布三十  
匹白細苧布三十匹黃細綿紬二十匹紫細綿紬二十

匹白細綿紬三十匹龍文簾席二張黃花席一十五張  
滿花方席一十五張雜彩花席一十五張白綿紙二千卷

使臣叅宴等謝恩  
有表咨而無方物○六月七日到安陵節度使營觀德

堂有先祖忠肅公儼使時詩版先君文靖公以冬至使



續題余於今行又敬和刻揭而三世俱按筭藩實屬稀  
異故聯句及之詩曰迢迢京國久離羣獨上高樓倍戀  
君臨水重關西塞路凝霜畫戟朔方軍一家王郎三箕  
域十載星槎再薊門慙愧常陰經過地敢云繩美荅憂  
勤○十一日到龍灣起程以後積雨快晴千餘里行役  
能免阻水涉危寔荷王靈收暨也自十二日復成長  
霖三江漲溢不得渡一旬滯留鎮邊軒愁思悄然次李  
月沙韻示兩檢書詩曰年華滾滾水爭流積雨龍灣卽  
近秋漢使乘槎迷舊路燕都訪客憶前遊風沙浙滙遼

聲合平楚空濛鴈翅浮千里觚稜勞遠夢北辰高處更  
登樓又曰三到龍灣閱幾星行人猶慣短長亭來句舊  
舍迎髻白賀壽新槎指岱青節序驚心螢草色華夷分  
界鴨流汀應知萬國趨王會原隰悠悠不輟停○十二  
日別賁咨官張瀛還渡江禮部回咨中皇帝以專差使  
臣進賀大加褒嘉恩諭鄭重張瀛則阻雨留灣回咨則  
寔陪持呈于脩邊司大臣奏請更具咨咨付送于進賀  
行又關飭使行姑勿渡江等待咨咨成送○二十一日  
夜二更禮部飭行咨文一度盛京將軍飭行公文一度



自鳳凰城傳到令進賀一行務於七月旬前往赴熱河  
期限促迫事勢急來以不得遲待咨咨明日渡江具由  
馳啓使任譚李光烈留待咨咨賫奉趕來于中路入柵  
後送言鳳城將及瀋陽禮部俾勿阻攔公文曰盛京將  
軍衙門為劄行事左禮司案呈准禮部咨開為咨行事  
主客司案呈本年五月准 朝鮮國差來賫咨官張瀛  
咨請本部轉奏該 國謹擬萬壽聖節仍遣使恭進方  
物等因經本部具奏奉旨准行在案今安南南掌緬甸  
等國恭祝萬壽貢使俱定於七月初十日到熱河預備

筵宴相應飛咨盛京將軍轉飭 朝鮮國貢使安速趨  
行徑赴熱河務於七月初十日以前趕到不必到京後  
再行前往轉致紆折可也等因前來相應飛咨 朝鮮  
國文到遵照部咨事宜該 國貢使務于七月初十日  
以前徑赴熱河以脩筵宴勿得稍遲外仍飭知該貢使  
務遵照部文星速趨行毋悞併劄飭鳳凰城遼陽城守  
尉查界協領等文到即在於 朝鮮國貢使經由處所  
出派妥員俟該 國貢使到境務須以部文看視催令  
趨行勿得任其遲延仍將過境日期飛投查核此件部



文本衙門於本年六月十八日接准隨於是日由駟飛  
咨該國并飭知各屬之處聲明咨報禮部及知照盛  
京禮部移付右兵司其咨朝鮮國封筒一角劄飭鳳  
凰城公文一角及劄飭朝鮮國貢使公文一角咨送  
盛京兵部希即交駟由日行五百里遞送其劄貢使公  
文務于途次遇見時投交可也為此合劄須至劄者右  
飭行朝鮮國貢使准此乾隆五十五年六月十八日  
六月二十二日辛未晴渡鴨綠江暫歇于九連城止宿于  
溫井坪是日行七十里○鴨綠江源出長白山西南流

二千里繞上國吉林烏喇之南界我國咸鏡平安之北  
界至鳳凰城東南入海即古馬訾水或呼靉江○九連  
城即明之鎮江城清一統志云九連城在鳳凰城東金  
史幹魯于合懶甸等九城與高麗對出戰入守今鳳凰  
城邊外有九連城遺址按金史高麗出兵曷懶甸等九  
城幹魯亦對等九城今以金史麗史叅證尹侍中瓘所  
等九城在咸雄英吉福宜等界而咸鏡南道之為曷懶  
甸無疑然則幹魯所等亦當屬咸鏡南道清一統志以  
九連城傳會者誤甚○是日午後盛京將軍飭行公文



又自鳳凰城傳到公文曰盛京將軍衙門為飛行嚴催  
事左禮司案呈於本年六月二十日准禮部咨開為咨  
准事主客司案呈本年安南南掌緬甸等國恭祝萬壽  
貢使俱於七月初十日以前趕到熱河筵宴所有 朝  
鮮國貢使前經飛咨盛京將軍轉飭該 國貢使務於  
七月初十日以前趕赴熱河入宴在案今恭查上次四  
十五年皇上七旬萬壽該 國遣來使臣於八月初間  
始到熱河筵宴本年熱河筵宴各國使臣定期七月初  
十日齊到恐 朝鮮使臣此時甫經起程若不催趲速

行屆期倘不能到殊於體制有關相應再行飛咨盛京將軍轉飭該國貢使務須星夜趲行刻期於七月初十日以前徑赴熱河與各國貢使一體入宴切毋遲悞併將該使臣等現至何處如何令其安速前赴熱河不悞筵宴先行咨報本部可也須至咨者等因前來查此案於本年六月十八日接准貴部來咨業經本衙門隨於是日限日行五百里飛咨朝鮮國並該國貢使及咨報貴部在案其該國貢使經由沿途預派官兵照料催趲行程如該貢使就近由九關台赴熱河一路



並無驛站恐其遲悞已飛飭義州旂民地方官預脩壯  
車健馬應付趲行仍飛飭遼外朝陽赤峯建昌等縣一  
體照料脩辦過行並咨行盛京禮兵二部奉天府府尹  
應脩事宜一體預脩等因具奏亦在案茲於本月二十  
日已刻復准咨催前來查該國貢使現今並未到境  
除於是日限日行五百里飛咨朝鮮國併飭行該  
國貢使務須遵照部文星夜趲行外俟該貢使于何日  
到境之處再行飛咨報部理合先行咨報禮部併飭作  
鳳凰城遼陽城守尉查界協領外其咨報禮部飛咨

朝鮮國併飭行貢使鳳凰城封筒各一角咨送盛京兵部希即交駟由日行五百里遞送其飭貢使公文務於途次遇見投交仍咨行盛京禮部併移付右兵司查照可也須至飭者右飭行 朝鮮國貢使乾隆五十五年

六月二十日

二十三日壬申晴暫歇于鳳凰山下止宿于柵門內是日行五十里午前到鳳凰山下邀致城將之際吉報飛傳以六月十八日申時 元子誕生億萬年景錄自今伊始一行蹈舞懽聲齊騰頃刻間傳播於柵內通官章京



華亦皆顛倒來賀可見秉彝之所同然無此疆再界也

○盛京遶牆南起鳳凰城北至開原折而西至山海關  
周一千九百五十餘里又自開原威遠堡而東歷永吉  
州北界至法威哈長六百九十餘里編木為牆殆同折  
柳樊圃以存中外之界限而已旗民一名守八里柵每  
年擔當修補遶門凡二十一鳳凰城遶門在鳳凰城南  
三十里通我界龍灣靉河遶門在鳳凰城北一百二十  
里通我界玉江鎮辛亥水洞汪清遶門即興京遶門在興京  
東南三十里通我界昌城雲頭里廳廠遶門在興京南

一百四十里通我界楚山婆瀾江英額邊門在開原東  
二百里通我界江界滿浦鎮威遠堡邊門在開原東北  
三十里通我界江界廢四郡發庫邊門在開原東北二  
十里彰武臺邊門在廣寧東北一百七十里清河邊門  
在義州東北五十五里白土廠邊門在義州東北一百  
三十里九關臺邊門在義州西北三十里長嶺山邊門  
在錦州西北九十里新臺邊門在錦州西一百三十里  
松嶺邊門在錦州西北九十里梨樹溝邊門在錦州西  
一百四十里白石嘴邊門在錦州西南二百一十里鳴



水塘邊門在錦州西南二百九十里開原以西邊門外  
皆為蒙古科爾沁等諸部駐牧地方十七邊門即盛京  
將軍所統轄每門設章京筆帖式各一官兵或五十或  
四十稽察出入布爾德庫蘓巴爾漢在吉林烏喇西北  
五百六十八里赫爾蘓在吉林烏喇西北四百六十里  
衣屯在吉林烏喇西北一百九十里巴延鄂佛羅在吉  
林烏喇北二百一十里右四邊門即寧古塔將軍所統  
轄每門設章京筆帖式各一官兵二十〇是日午後盛  
京將軍飭行公文又自鳳凰城傳到公文曰盛京將軍

衙門為飛行飭知事左禮司案呈於本年六月二十一日准禮部咨開為咨行事本年安南南掌緬甸等國恭祝萬壽貢使俱於七月初十日以前趕到熱河筵宴所有朝鮮國貢使業經行文盛京將軍轉飭該貢使於七月初十日以前徑赴熱河在案今本部於本月十四日接行在禮部來札內開奉和王中堂和珅諭朝鮮遣使恭祝萬壽一事奉上諭該國使臣若于七月初邊能到熱河即令其前來如不能到聽其自便亦不必催欽此欽遵恭錄到部相應移咨盛京將軍酌量該使

臣等於七月初十日以前能到熱河仍令前往恭與筵宴並將該國貢使於何日起程何時可以到京之處先行咨報本部可也等因相應飛行飭知該國貢使遵照可也須至飭者右飭行朝鮮國貢使乾隆五十五年六月二十一日見公文後即以使臣等六月二十三日入柵星夜馳進期於二十七八日間抵瀋陽自瀋陽取九關台捷路七月初旬間得達熱河書通于鳳凰城將轉報盛京將軍○鳳凰城守尉額爾恒額滿洲人申時始來到衙門開柵門使臣過衙門卸轎偃蓋幕裨



譯官皆下馬自衙門查考一行人馬捻數以報禮部及  
盛京將軍

二十四日癸酉朝霧夕晴歷鳳凰城炊飯于三臺子秣馬  
于雪裡站止宿于黃家庄是日行一百五里○鳳凰城  
在狼頭山之西北一里六道河之東北四里周本歲朔  
地至秦屬朝鮮漢屬玄菟晉隸平州隋屬高麗慶州地  
唐平高麗屬安東都護後渤海大氏據之為東京龍原  
府遼改開州鎮國軍屬東京金為石城縣地元屬東寧  
路明為鳳凰城堡清天聰八年設官兵於通遠堡崇德

三年移此鎮守城週三里八十步南一門未詳始建之

年乾隆癸卯因舊址重建

乾隆戊戌修繕盛京所轄邑鎮城池十八處予限五年至

癸卯工竣凡用帑銀一百三十一萬兩

駐防守尉一已再呼佐領一防禦

八驍騎校八蒙古驍騎校一筆帖式一迎送官三主客

官一朝鮮通事二自迎送官以下掌我國入貢之事

守尉所領滿洲漢軍蒙古兵共七百五名○鳳凰山在

城東南五里上有壘石古城可容十萬衆即渤海國太

子所居明一統志云唐太宗征高麗駐蹕於此按唐書

太宗自安市班師未嘗至此帽廬山在城西南五十里

六道河發源於此分水嶺在城西北一百三十五里響  
水河通遠堡河發源於此西北僅入太子河又復東南  
匯鴨綠江入海摩天嶺在城西北一百七十里青石嶺  
在城西北一百九十五里細河在城西北一百四十二  
里源出小黑山會響水河北流入太子河草河在城北  
三十里源出桃樹峪會通遠堡河六道河東南流入靉  
河○清一統志云明成化十七年朝鮮使臣還國道經  
鳳凰山下遇掠奏乞於舊路南別開一路以便往還因  
葺此城明史劉大夏傳云朝鮮貢道故由鴉鶻關至是



請改由鴨綠江大夏曰鴨綠道徑祖宗朝豈不知顧紆  
迴數大鎮此殆有微意不可許按成化庚子奏請使韓  
明澮以女真邀劫乞改貢道事下兵部將從之職方郎  
中劉大夏曰朝鮮貢道自鴉鵲關經遼陽廣寧前屯入  
山海紆迴三四大鎮若自鴨綠直達前屯山海取路太  
徑恐貽他日憂鴉鵲關即連山關貢道不由鴉鵲則當  
自鳳凰城遶門取遼陽以南路抵前屯清一統志謂因  
改貢道等鳳凰城甚誤勿論鴉鵲大路與遼陽南路皆  
由鴨綠江明史謂改由鴨綠亦誤○余與正使書狀賁

奉表咨簡來行裝率幕裨四負譯官三負鴈字官一負  
從人三十名越站先進取路九關台向熱河他餘幕裨  
譯官等領方物所載車及從人刷馬驅人按站前進取  
路山海關向燕京

二十五日甲戌雨炊飯于通遠堡止宿于連山關是日行  
八十里連山關一名鴉鵲關羅德憲等棄國書即此地  
清天聰十年四月諸貝勒大臣滿漢文武各負奉表言  
皇上承天眷祐應運而興愛育羣黎輯寧諸國更獲玉  
璽符命昭然請上尊號曰寬溫仁聖皇帝三請始俞乃

於四月十一日祭告天地太廟等壇於德盛門外即皇帝位建國號曰大清改元崇德宣諭羣臣皆行三跪九叩禮惟我國春信使羅德憲李廓不拜太宗諭曰

朝鮮使臣無禮處難以枚舉是皆朝鮮有意構怨欲朕先啓釁端戮其使臣加朕以背棄盟誓之名耳朕終不肖逞一時之小忿兩國爭戰之際亦無戮其來使之理況朝會乎其勿問尋遣羅德憲等歸答書極其悖慢德憲等棄之連山關而來

二十六日乙亥晴炊飯于甜水站秣馬于佟家庄止宿于



冷井站是日行一百一十里遷牆內之冷井以東各堡  
遷牆外之寬永等諸莫皆為鳳凰城守尉專轄而不隸  
府州縣○萬曆初兵部侍郎汪道昆閱邊李成梁獻議  
移建孤山堡於張其哈剌佃險山堡於寬佃沿江新安  
四堡於長佃長嶺諸處仍以孤山險山二叅將戍之可  
拓地七八百里益收耕牧之利道昆上於朝報可自是  
生聚日繁至六萬四千餘戶及萬曆三十四年成梁以  
地孤懸難守與督撫蹇達趙楫建議棄之盡徙居民於  
內地居民戀家室則以大軍驅迫之巡按御史熊廷弼

奏言棄地非策帝眷成梁留中不下

二十七日丙子晴歷觀遼陽廣祐寺白塏炊飯于東京迎  
水寺止宿于十里河舖是日行八十里○遼陽州秦置  
遼東郡漢置襄平縣為遼東郡治後漢因之晉為遼東  
國治大興初為慕容廆所據後燕時地入高句麗後魏  
至隋俱屬高句麗為遼東城唐貞觀十九年征高麗克  
遼東城以其地為遼州上元三年移置安東都護府於  
此後廢遼初建東平郡天顯三年升為南京十三年改  
曰東京置遼陽府復置遼陽縣為府治金因之元初置

東京總管府至元二十四年立遼陽等處行中書省二十五年改東京為遼陽路以遼陽縣為路治明洪武四年置定遼都衛八年改遼東都指揮使司領衛二十五州二都司所治為定遼左右前後四衛東寧衛自在州中左二千戶所左右前後四千戶所清順治十年設遼陽府領遼陽海城二縣十四年罷府為遼陽縣康熙四年改為遼陽州屬奉天府遼陽城池洪武壬子都指揮馬雲榮旺因元遺址修葺都指揮潘敬開擴東城迤北土城永樂丙申都指揮王真包砌週一十一里三百九



十五步高三丈三尺池深一丈五尺週二十四里二百八十五步門九後皆頽廢乾隆癸卯重建城內惟知州駐治而官兵駐防則在東京城內東京城在太子河東邊離遼陽州城八里清太祖天命六年建週六里十步高三丈五尺門八駐防城守尉一防禦八巴爾呼佐領一驍騎校九筆帖式一倉官一外郎二所領滿州蒙古兵共六百五十六名遼陽處廣漠之野而兼陸海之利北控寧錦關外之形勢相接西通登萊南方之商舶咸湊清之大統實基於天命之先據遼陽此所以為邊徼

必爭之地八堡為遼陽之內衛四莫為遼陽之外屏李  
成梁之撤去四莫失計之大者無乃萬曆以後遼事將  
興而天使之然耶○天命六年太祖既拔瀋陽以瀋遼  
胥遠相依不可不並取遂進兵遼陽清軍陷城時明經  
略袁應泰登城北鎮遠樓督戰見城破舉火焚樓而死  
分守道何廷魁率妻子投井死監軍道崔儒秀自經總  
兵朱萬良副將梁仲善叅將王宥房承勲游擊李尚義  
張繩武都司徐國全王宗盛守備李廷幹等皆戰歿御  
史張銓被擒脅之降不屈死○華表石柱舊在城內鼓

樓東丁令威化鶴所集今無搜神記云丁令威遼東人  
學道於靈虛山後化鶴歸遼集于城門華表柱時有少  
年舉弓欲射之鶴乃徘徊空中而言曰有鳥有鳥丁令  
威去家千年今始歸城郭如故人民非何不學仙塚纍  
纍遂高上冲天清一統志云華表山在城東六十里俗  
呼一擔山亦因丁令威化鶴得名關帝廟在西門外元  
至元乙酉創建迨有上諭碑其文曰乾隆四十一年八  
月內閣奉上諭關帝在當時力扶炎漢志節凜然乃史  
書所謚並非嘉名陳壽于蜀漢有嫌所撰三國志多存



私見遂不為之論定豈得為公從前世祖章皇帝曾奉  
諭旨封為忠義神武大帝以褒揚盛烈朕復于乾隆三  
十二年降旨加靈祐二字用示尊崇夫以神之義烈忠  
誠海內咸知敬祀而正史猶存舊謚隱寓譏評非所以  
傳信萬世也今當抄錄四庫全書不可相沿陋習所有  
志內關帝之謚應改為忠義第本傳相沿已久民間所  
行必廣難於更易著交武英殿將此旨刊載傳本用垂  
久遠其官板及內府陳設書籍並著改刊此旨一體增  
入欽此廣祐寺在西門外不知創自何代清天聰九年

重修有白塔高數十丈世傳唐尉遲敬德所募俗呼為  
白塔寺殿奉自來佛一尊前代有鄉民貿易廣寧路遇  
童子曰我往廣祐寺能負我往以銀布相酬其人諾之  
數百里不終朝而至抵寺則一金身佛像也數人舁之  
不動寺僧異之酬以銀布康熙二十一年駕幸寺特賜  
袈裟白塔東旁有碑丙申過此猶辨塔高三十六丈一  
句今磨泐不可讀千山在城南六十里奇峰疊聳峭壁  
嵯峨上有祖越龍泉香巖中會大安五寺蓮花月芽獅  
子彌勒淨瓶鉢盂海螺漱瓊松苔上夾下夾筆架等峰

玉皇閣萬佛閣仙人奕棋石枰諸勝蹟沙河發源於此  
太子河在城北十五里源出遼外吉林烏喇薩穆禪山  
自葦子峪直入遼西南流匯渾河遼河為三汊河十里  
河在城北六十里源出廟兒嶺流至楊家灣合沙河入  
渾河舊名稠柳河明時虘皮驛在此○自遼陽至燕京  
大路左右夾以楊柳霽則為行人之庇蔭潦則為大路  
之標識靡此商旅之喝焦渰溺者多矣自熱河至燕京  
亦然各該地方官分段看守定限保活雍正間以栽柳  
勤慢屢下勅諭載在會典工部仁政之及民遠矣近古



我國使見之反比汴河柳覬國若是焉用彼專對哉  
二十八日丁丑雨炊飯于白塔鋪止宿于瀋陽是日行六  
十里申時到城南藥王廟暫歇余與正使書狀捨轎乘  
馬去蓋陪奉表咨由德盛門入住接于閤舍盛京將軍  
嵩春即宗室為叅八月十三日萬壽宴是日早朝發向  
燕京而進獻物種所載車八十餘輶云通官寶德迎送  
官西林泰皆滿洲人自鳳凰城遶門護行至此通官則  
仍隨向熱河迎送官則直向燕京○瀋陽古挹婁地禹  
貢青州之域兩漢時屬遼東郡唐屬安東都護遼金二

代始建東京於遼陽置瀋州昭德軍元為瀋陽路明置  
瀋陽衛清天命十年自遼陽遷都於此升為盛京天聰  
五年築城甃以磚石高三丈五尺厚一丈八尺女牆七  
尺五寸週九里三百三十二步四面垛口六百五十一  
敵樓八座角樓四座有八門南之左曰德盛右曰天佑  
北之左曰福勝右曰地載東之南曰撫近北曰內治西  
之南曰懷遠北曰外攘門各有樓池濶十四丈五尺週  
十里二百四步鍾樓在福勝門內大街鼓樓在地載門  
內大街順治元年定鼎燕京以盛京為留都十四年設

奉天府領州二縣六

遼陽州復州承德縣海城縣蓋平縣開原縣鐵嶺縣寧海縣錦

州府之州縣皆隸焉

寧遠州義州錦縣廣寧縣

康熙十九年等闕牆

高七尺五寸週三十二里四十八步東南隅有水柵二

各十餘丈瀋水自南出為城內正中有宮闕崇德二年

所建門曰太清殿曰崇政乾隆丙寅貯五朝實錄於崇

謨閣乾隆癸卯藏四庫全書於文溯閣

乾隆帝製癸卯集曰朕六十三

歲降旨集四庫全書始思浩如淵海茲甫十年而功就

亦大快事壬寅仲春四庫全書第一分告成弄置文溯

閣癸卯春第二分亦竣勅總校內閣學士陸費墀送至

盛京弄置文溯閣第三分弄蒞園之文源閣者擬於明

歲告成第四分弄避暑山莊城內東南有朝鮮館即我

之文津閣者擬於明年告成



孝宗寓邸而顯宗誕降之所城內治事官吏有奉天府尹及戶禮兵刑工五部侍郎城內鎮守有奉天將軍及副都統駐防有協領九漢軍總尉二主事一佐領六十六驍騎校六十六防禦十一筆帖式十外郎六所領馬兵五千七百二十八名步兵八百名○府治東南文廟前有卧碑文曰崇德元年太宗諭諸王貝勒大臣曰昔金世宗奮齒法祖惟恐子孫效漢俗預為禁約以無忘祖宗為訓衣服語言悉遵舊制時時練習騎射以脩武功先時儒臣巴克什達海庫爾禪屢勸朕改滿洲衣

冠效漢人服飾制度朕不從實為子孫萬世之計在朕  
身豈有變更之理恐日後子孫忘舊制廢騎射以效漢  
俗故常切此慮耳爾等其謹識朕言乾隆十七年春恭  
讀實錄敬述此諭鑄立卧碑於箭亭以示子孫臣庶遵  
聽毋忘為萬年法守云實勝寺在外攘門關牆外崇德  
六年太宗以偏師破明總督洪承疇兵十三萬於松山  
杏山歸建此寺紀功績寺內有嗎哈噶喇樓天聰九年  
元裔察哈爾林丹之母以白駝載嗎哈噶喇金佛並金  
字喇嘛經傳國璽至此駝卧不起遂建樓云天柱山在

城東北二十里奉太祖福陵隆業山在城西北十里奉  
太宗昭陵小瀋水在城南自東關觀音閣東泉眼發源  
至驪子園南入渾河瀋陽之名以此渾河在城南十里  
源出長白山納魯諸窩集中西北流入英額邊門繞盛  
京西南至王大人屯東南與太子河會西流合遼河為  
三汭河入海遼河在城西一百里即句驪河今稱巨流  
河源出長白山西北諸窩集中為赫爾蘓等河自開原  
縣明安貝勒屯入遼至開原城為巨流河經海城縣西  
與太子河會為三汭河入海遼東遼西以巨流河左右



分界○盛京將軍所轄疆域東至興京遼吉林烏喇界  
二百八十餘里西至山海關八百餘里南至金州南海  
境七百三十餘里北至開原遼境二百六十餘里東南  
至遼門外鎮江城界五百四十餘里西南至海八百餘  
里東北至威遠堡二百三十餘里西北至九官臺遼門  
四百五十餘里○瀋陽北極出地四十二度即遼野之  
上游清之丕基肇于長白而盛于瀋陽故天柱隆業為  
長白之餘麓渾河遼河皆發源于長白大抵山川之融  
結必有氣數之湊值周道始于豳岐炎運起于豐沛是

豈可以容人智力耶長白山即山海經之不咸山自分水嶺西至興京樹茂林深土人呼為納魯窩集興京界內諸河多發源於此萬曆間熊御史廷弼之巡按遼東纔經兵燹千里無人煙廷弼令僉事閻鳴泰往撫瀋陽僅至虎皮驛慟哭而返廷弼乃躬親巡歷自虎皮驛即十里河舖抵瀋陽想像當時光景四郊多燐極目荒涼而今休養耕牧已及百餘年不獨盛京城內官府市廛之繁華佳麗亞於燕都奉天錦州二府人戶為四萬七千一百二十四民田為一萬八千四百五十二頃七十七畝

官莊田為四萬六千三十六日五畝八旗田為二百三十六萬七千八百四日四畝從古邊徼之富庶未有若是之盛也○自外攘門外至西關門內通衢左右皆市廛此即洪學士翼漢尹學士集吳學士達濟丁丑成仁處憑式過之愀然起敬黃石齊所謂綱常萬古節義千秋天地知我家人無憂者三學士有之時諱嚴密迹茫昧以亭林榕村諸先輩之好獎節義亦不曾語到三學士事悲哉

二十九日戊寅晴薄暮離發到城外十里地塔院止宿連



日越站輜馬疲頓勢難早夜趨程雇太平車九輛三使  
及幕裨譯官分乘盛京副都統成策滿洲人也送助任  
車三輛故俱載行裝雙輜及扶平驛馬直送燕京雇車  
時車主覘其急呼賞比前十倍鳳城將適來瀋中欲德  
色於我拘囚九車夫而減其價車主銜憾募一光棍佟  
姓漢領九車所謂佟漢自稱正黃旗下言貌極可憎九  
車夫皆聽其願使而行住五里必休馬十里必買酒到  
處遲滯或叱車夫以快走則佟漢替對曰泥淖掣不動  
沒奈何牲口可憐一行真不絕憤

七月一日巳卯陰炊飯于永安橋秣馬于老邊城夜渡巨  
流河曉入巨流河堡暫歇晝夜無行為九十里夜二更  
到巨流河東遙濃雲四布天野渾黑仰視雲縫中電光  
燁燁勾繞如騰龍西北風大作車燈盡滅咫尺不辨所  
向而河只有二船屢往來載涉艱辛萬端因佟漢之為  
戲魔使一行值此光景思之扼腕○巨流河城清常德  
元年所建過二里門三乾隆癸卯重修駐防佐領二驍  
騎校二所領滿洲漢軍兵一百四十名隸廣寧○到永  
安橋通官寶德來告副都統成策送白金五十兩于正

副使以助行資矣余使寶德回報都統曰俺等因行在  
禮部指揮擬赴本月旬前後得達熱河昨日車馬之惠  
即致身之具固不敢必辭而今茲白金近於貨嫌於私  
厚意雖可感無以領受還切不恭之悚仍思此等徃復  
易致中間乾沒故以回到瀋陽當修謝於都統言及寶  
德

二日庚辰朝雨夕晴炊飯于新民屯止宿于白旗堡是日  
行七十里○白旗堡駐防佐領二驍騎校二所領滿洲  
漢軍兵一百四十名隸廣寧○留灣譯官李光烈賁奉



咨文二度及正副使處別諭趕到咨文曰當職伏奉年  
前皇旨有曰俟得有子嗣即行奏明冊封世子承續宗  
祧用延國慶拜稽莊誦且惶且感願念小邦偏蒙厚渥  
錫賚之便蕃思念之庇覆迥出常格有請輒許無願不  
遂而至以藩服之嗣續乃煩聖諭之鄭重又於今年春  
賤价之回特頒福字宸翰無以百幅華戔煌煌寶墨照  
映一國遂以大堯壽富貴多男之盛用寓洪範歛五福  
敷錫之意當職與一國臣民感戴銘鏤北堂攢手皇恩  
收暨景貺必周吉慶之來日夕以俟果於本年六月十

八日副室生男自天之雲章纔頒小邦之宗祧有托  
惟此嗣續之慶實是皇上收賜歡欣感祝之誠百倍于  
中事當恪遵前旨即為奏請而第念當職幸托皇上之  
洪庥得此子男區區私情惟願慎護育養遲待數年俾  
永徽皇上萬年之恩今以冲幼之質遽膺封冊之典華  
誥儀章赫然賁臨則既非所以惜福謹度之意且不得  
拜跪行禮則亦非所以敬皇命重恩賜之道也錫以遐  
祉俾有今日之慶即我皇上之恩也待其稍長以永方  
來之福亦我皇上之恩也以皇上生成萬物之德既欲

其有子嗣則又必許其姑徐封典以為終始之澤茲敢  
不避猥越具由移咨煩乞貴部善為轉奏施行別諭曰  
皇天祖宗垂臨眷顧祚胤之慶神人有托邦本自此有  
盤泰之固歡欣忭喜中外同情此時卿等適當專對之  
任周旋導達一如所望昨以筵教自內閣錄送亦令副  
价之弟書通固知卿等之十分宣力而前此皇旨中既  
有即行奏明之語在我國道理雖不可不即時轉奏而  
異於封典之請則奏表不但近於屑越今予一念惟在  
遲遲必欲仰遵 肅廟封冊時春秋亦依予之受冊年



紀此意撰出咨文下送卿等賫往後見幹事大臣以邦  
慶報聞遵皇旨也欲遲遲待年長亦小邦至願也今日  
之得有邦慶皇上所賜感頌攢祝之情固難容說而似  
此儀文間事亦若體諒小邦區區情願則是亦皇上字  
覆之恩以此轉達為言如是中諭卿等可以知予意庚  
戌六月二十日左承旨李祖承成貼○纔經潦雨瀋陽  
前後平野皆泥淖墊溺成水匯丈餘咫尺相望之地輒  
紆迴數里而至但用太平車勢難趨程且車夫輩為佟  
漢所制百計留滯空費時刻遂與正使相議在大車二

輅各駕五馬分乘無載表咨橫公服函擬早夜疾驅書  
狀及幕裨譚官仍乘太平車隨之○到新民屯見一僵  
房繡鞍駿駒簇立門外健校豪卒彌亘途旁聞是盛京  
將軍所寓而按官站行故今纔至此云余坐稍間之僵  
房方炊飯將軍始發向燕京路執旗而騎橐鞬而騎佩  
刀而騎者各二隻前導將軍乘太平車前面及左右張  
青帳駕三馬後護騎從五十餘人召首譚洪命福駐車  
問曰宴日漸近使臣何不催進命福曰千餘里越站作  
行人馬俱困頓而前程尚遠泥濘轉甚惶悶不知所以

為計將軍曰議于白旗堡驛丞推移駟騎遂使通官以將軍言往復驛丞得駟騎四匹

三日辛巳朝陰夕晴炊飯于一板門止宿于二道井是日行五十里自一板門至二道井二十里為遼野之寂寥下處水涯沒馬腹半日行潢流中黃昏僅到二道井

四日壬午晴炊飯于新店暫歇于白臺子止宿于正安堡是日行八十里自二道井至新店三十里水涯尤深以艤濟人而津艤皆待於盛京將軍行只餘三小船三使分乘日午僅得渡泊於新店○自新店後岡正西走小



黑山為山海關路西北走白臺子為熱河路白臺子以  
後遼野始盡阜陵漸高成數三里或五六里多有明時  
煙墩戚繼光李成梁之遺跡想像如昨清有天下叅用  
蒙回諸部朝廷太半是色目人以中華之利與外夷共  
之故遼塵之不警已百餘年見今田疇相連鷄犬相聞  
晝行夜宿毫無戒懼三衛百戰之地悉變為樂土此歷  
代所不能得也到白臺子始入廣寧界知縣張凱元漢  
人也送章京護行義州知州文良亦漢人也送章京甲  
軍探問入州期且致猪羊各一頭皆曰盛京將軍指揮

也

五日癸未晴炊飯于四堡子踰魏家嶺暫歇于花兒樓渡

細河止宿于關帝廟站是日行八十里○魏家嶺以東

為廣寧界以西為義州界南為中國界北為蒙古界南

北界間設柳條城

即遼

九關臺等諸邊門廣寧馬市

河發源於此嶺間之土民蒙古近多居住於柵外而有

室廬事耕牧舉皆安土重遷頓變舊俗云昔金人入據

中原文移儀節服飾器用漸學華制以致委靡不振使

蒙古安土重遷實清之大利也細河源出遼外土默特

過達里嶺名衣馬崙河西南流由清河邊門東入境為  
細河又東南流入大凌河○自義州界士卒數十名護  
行按站交替踰嶺涉河輒為之推挽扶擁或持畚鍤平  
治途路藉力甚多亦曰盛京指揮而調發也

六日甲申晴炊飯于高臺于秣馬于廟口站渡大凌河止  
宿于義州城內是日行七十五里州治在五十里平野  
中大凌河繞城東北距城不過數百步野外周遭之峰  
巒皆窈窕明麗河流逶迤粉堞照耀閭井市廛極其繁  
華實遼徼雄府也行到河濱五大船百餘曳船卒整待



三使坐車而登船餘皆下車而上船端勢悍急而頃刻  
穩涉自羅麗以來我使未嘗過此故及到城下觀者如  
堵挾轂遮道不勝其酬答蓋以初見漢官儀容先問冠  
服品級也知州送人迎入官門外公館一行俱官供而  
三使各具十餘器盤飧待之饌品甚豐潔幕裨譯官及  
從人則給口糧猪鴨又脩送壯車十三輛裝以蘆簟各  
駕健馬五匹皆因盛京公文指揮也濡陽副都統所送  
任車三輛白旗堡所雇大車二輛濡陽所雇太平車九  
輛自此還之○義州漢無慮縣地唐為營州地遼置宜

州崇義軍金改曰義州屬北京路元屬大寧路明置義  
州衛屬遼東都指揮使司清初以其地賜察哈爾康熙  
間察哈爾叛討平之設巡檢司屬廣寧縣雍正間陞為  
義州屬錦州府義州城池明洪武間指揮何浩仍舊修  
葺永樂宣德間都指揮楚勇甃磚週九里十步高三丈  
門四城內正中有十字街鍾樓池深一丈五尺濶三丈  
八尺週九里一百六十六步清康熙間城守辛珠巡檢  
俞定陸續修葺乾隆癸卯又修葺城內駐防守尉一佐  
領十九驍騎校十九筆帖式一所領滿洲漢軍蒙古兵

一千四百九十一名○牽馬嶺在州東南五十五里山  
脉與醫巫閭山相接勢極險峻中通驛路九官臺山在  
州西北三十六里九官臺邊門在山北帽兜山在州西  
南六十里楊樹溝河發源於此大凌河在州治東北源  
出遼外喀喇沁尾蘓圖山名教木倫河東流自義州西  
九官臺門東入遼為大凌河遶義州城北東南流經杆  
頭山入錦縣界流九十三里至團山東又六十五里至  
鮎魚塘入海柳河川河在州西二十九里源出遼外土  
默特神應山名崑齊七老河由九官臺邊門西南二里



入境為柳河川河東流入大凌河○城外連阡黍稷一  
望披靡人家到處顏壓景色驚心問諸土民自六月二  
十七日大雨至今月三日始霽而河水漲溢漂溺人家  
為百餘戶湮沒人口殆千餘名知州報聞于盛京工部  
漂溺湮沒之數太半剋減怨聲嗷嗷云報工部以屬河  
工也

七日乙酉炊飯于頭到河于出六臺邊牆渡柳河止宿于  
石人溝之地藏寺是日行六十里禮部公文指揮則使  
由九官臺門而日前大雨九官臺內外山路舉皆衝破

車馬不得通故紆迴向六臺出邊牆是為朝陽縣界九  
官臺門距義州為三十里而六臺則為五十五里自六  
臺至地藏寺又五里寺有喇嘛僧住持自言西藏人接  
待款洽且脩酪茶酥餅榛棗葡萄等屬饗三使茶餅香  
甜淡泊葡萄亦清爽以清心元四九扇六把酬之入見  
其方丈鼎彝几席莫不古雅華潔壁揭皇六子質親王  
對聯書而筆法流動迥麗貴氣可掬惜其不能永年也  
夜宿東寮露滴階松月掛疎簾翛然有出塵想

詩曰乘車且乘舸何事行不休

偶到玄藏界仍逢赤壁秋篆烟沈佛座松月入欄頭指  
日面王會堪排出塞愁○自九關臺門西至熱河即蒙  
古土默特二旗喀喇沁二旗地清初設七廳隸熱河乾  
隆丙申以三座塔廳為朝陽縣治以塔子溝廳為建昌  
縣治以八溝廳為平泉州治並隸承德府○土默特地  
界東至楊柳木牧廠界西至喀喇沁右翼界南至九關  
臺邊牆界北至喀爾喀及教漢界漢置柳城縣屬遼西  
郡晉咸康中燕慕容皝改為龍城縣遂建都號和龍宮  
元魏為營州治隋復置柳城縣為遼西郡治唐為營州



都督府治後為吳所據遼太祖平吳置興中府隸中京  
道金因之元降為州屬大寧路明初以內附部長為三  
衛指揮使自錦義厯廣寧至遼河曰泰寧衛後為土默  
特所據清天聰間來降康熙間封左翼酋為多羅達爾  
漢貝勒右翼酋為固山貝子並世襲海他哈山華名旱  
龍潭山即左翼貝勒所駐大堤河發源於此通達里嶺  
華名弭勒嶺在左翼西北六十里細河發源於此巴煙  
花山華名大華山即右翼貝子所駐蘓巴再噶圖山華  
名神應山在右翼南三十里柳河川河發源於此衣馬

菑河華名殺羊河在左翼西北六十里源出彌勒山西  
南流經青山又南流會馬鞍山河入邊經義州東北為細  
河教木倫河華名大凌河在右翼西二百里東流經古  
興中城南折而東南流入九關臺邊牆為大凌河崑齊  
七老河華名柳河川河在右翼南三十里源出蘓巴再  
噶菑山東南流入義州境為柳河川河明安河華名小  
凌河在右翼西二百十里源出明安喀喇山東北流會  
木壘河入邊為小凌河○喀喇沁地界東至土默特及  
教漢界西至正藍旗王屯界南至邊牆界北至翁牛特

界秦漢為遼西郡境後漢為鮮卑地晉為慕容氏地元  
魏時庫莫奚居此唐太宗初奚內附置饒樂都督府隸  
營州後分為東西奚尋僅於契丹遼統和間建中京大  
定府金貞元間更為北京置留守司元為大寧路隸遼  
陽行省明洪武間置大寧都指揮使司封皇子權為寧  
王以鎮之永樂初徙封寧王於江西以大寧地賜三衛  
酋長朵顏寂強後為察哈爾所滅以地予其噶布囊是  
為喀喇沁清天聰間來降康熙間封右翼酋為多羅杜  
稜郡王雍正間封左翼酋為貝子並世襲已額朱爾克



山華名牛心山即左翼貝子所駐韋蘓山或稱尾山

名梓山在左翼西南四十里大凌河發源於此西白河

即右翼郡王所駐源出卯金掉漢拖羅海山東北流入

翁牛特右翼界賽因阿喇善溫泉在右翼西南一百八

十里即熱河之源願沁河華名青龍河在左翼西北一

百二十里源出長吉再岱山西南流入遼經永平府北

入灤河老哈河華名老河在右翼南一百九十里源出

明安山東北流經敖漢北翁牛特左翼南又經奈曼喀

再喀二部之北與潢河合統大寧城南入遼東三岔河

○蒙古土風有曰乳筩

以皮為之平底而豐下銳上將乳盛之甚便於行携牛馬羊乳

皆資飲食而捫酒惟馬乳為佳

曰荒田

農作非蒙古本業今承平日久所至多依山為田既播種則四

出游牧射獵秋獲乃歸耘耨之術皆所不講俗云靠天曰鄂博

蒙古舊俗不建祠廟山川神示若靈

應者纍石象山家懸帛以致禱報賽則植木為表謂之鄂博過者無敢化

曰革囊

以革為之用代筐篋

聖盞食用鉅細無所不納行汲或以野水涉川則挾之肘間亂流以濟或謂之皮餽餽

曰柴車

取材

於山不加刻斷輪轆器具以牛駕之行則鴉軋有聲如小舟欵乃

曰骨占

炙羊肩骨視其兆以覘吉

云猶古

曰馬竿

生駒未就羈勒放逸不可致以長竿繫繩縻致之蒙古寂焚其技

曰兜

版兜生在襁褓中令卧版上常束其兩臂倚檀廬壁間啼則搖之徙居則懸之馳裝之後

曰灰簡

木削兩簡編布聯之稍刻其中塗油而布以灰作字畢則拭去而更布之有古漆簡之風

曰竹竿

蒙古

產毫穎而未得縛筆之  
法削竹木漬墨作書  
曰口琴製如鐵鉗貫鐵絲其中

聲宛轉頓挫  
有第瑟韻  
曰轉經蒙古奉佛惟謹木輪中貫鐵樞可

以手推之小者持而搖之旋轉如  
風謂一轉功德與持誦一過等  
蒙古冠服男女並用

滿洲制而惟喇嘛僧蒙古謂喇嘛為  
滿洲制而惟喇嘛僧黃教見必膜拜戴金漆圓頂笠著

黃衣蒙古呼羶廬曰格再呼土尾屋曰拜姓羶廬即舊

俗而土尾屋近代始有之羶廬中穹窿而四圍低形如

覆釜前為出入門左右為通明窓土尾屋一依華制而

寺廟尤壯麗

八日丙戌晴炊飯于水邨予止宿于鱗牛營之福寧寺是



日行七十五里自義州至此百餘里間阜陵皆行遙明  
麗絕無巉巖疊嶽而川野相錯邨廬相望多則為數百  
戶少亦過數十戶蒙漢雜居柳比繁華到處有佛宇閨  
廟而宏邃潔淨或勝於內地所建阡陌俱墾五穀咸宜  
而獨無水田○自水邨子行二十里踰蠻子嶺嶺底路  
左有百餘戶名曰蠻子邨蓋北俗以漢人謂之蠻子元  
取南宋俘其民號曰蠻軍以辱之自昔已然也到福寧  
寺諸僧會坐佛殿前正堂而誦經住持僧云是西藏人  
衣黃袈裟踞椅向南左右各六僧衣紅袈裟踞榻東西

相向一齊念呪聲如蝦蟇唱諾嗎叻吃哮流汗淋漓日  
暮誦訖擊鉦鼓吹螺笛旋迴佛殿三匝而罷問諸住持  
僧則誦經即為皇上祝平安而每日如此云正堂扁曰  
梵安寺今皇上御筆也

九日丁亥晴渡大凌河炊飯止宿于朝陽縣之關帝廟是  
日行四十里義州車馬至此當交替而知縣諉以難辦  
使義州車馬仍為前進剋減雇價又不給口糧馬柴車  
夫等抵死苟免余議于正使書狀各出盤纏若干分給  
車夫等然後始乃願從知縣及護送通官往復相詰之

際日已暮遂留宿朝陽邑治在大凌河西北而數十里  
開豁環野諸山稍峻拔以是新設故無城池而官府市  
廛之雄麗亦遜於義州然地勢蘊藉人民繁庶足為遼  
外樂土前月晦大雨後河水決溢民戶之蕩析人口之  
渰溺殆甚於義州額垣破壁滿目慘然閭井通衢尚今  
沮洳車不得行馬亦沒腹余與正使書狀皆步入闕帝  
廟余所住炕壁有兩邨李調元手題七言律問之居僧  
數年前李以通水道過此題壁云丙申朝京余與李屢  
往復相熟李贈余詩有莫道相逢不相識早朝門外馬



駁駁之句蓋始遇於太和殿朝叅後負度門外也天涯  
十五年魚鴈落落今見其手題不覺眼開余到燕後聞  
諸兩邨從父弟鼎元則兩邨著刻涵海一部凡一百八  
十五種書而中有楊升菴所著四十種兩邨所著四十  
種其詩話三卷詳記與余往復事且載李侍郎書九柳  
得恭李德懋之佳句刻甫訖兩邨因叅罷去携板歸四  
川云廟宇潔淨蕭灑長松垂柳庇蔭層堦盆花列峙香  
颺裊裊庭有古碣題曰大遼興中府靈感寺釋迦佛舍  
利塢碑尚書都官貲外郎遼西路錢帛判官張嗣初撰

文即少府少監張檢子也碑文稱塔為柳城梁氏守奇  
道隣兄弟出家所建天慶六年丙申立碑本三塔其一  
已頽今存二塔地名三座塔因此而闕帝廟即靈感寺  
舊址也○朝陽縣遼為興中府元為懿州路興中州明  
為朶顏衛界清初設三座塔通判乾隆丙申陞為朝陽  
縣隸承德府○自朝陽以西蒙古男女之往來熱河者  
織路或乘車馬或乘馳驢夜則不入店舍就途傍水草  
豐饒處或數十車或五六車屯聚炊飯人宿車上馬放  
川邊間或設幕而炊飯蓋行則車為室止則橐為廬蒙

古本俗也○是日薄暮護送通官來示滿洲字公文使

清譯李惠迪翻出公文曰將軍衙門公爺的書予出派

委官四十五

即滿洲人

義州出派照看官負通同交給他打

發去了為是乾隆五十五年七月初七日和中堂送來

的書乾隆五十五年七月初三日奉上諭將軍嵩泰的

地方把

朝鮮國的使臣往熱河來的緣故奏了乾派

將軍把

朝鮮不庸催了照例一樣進京罷上諭是這

麼的來着將軍接交旨意以前這箇時候已經到那裏

不定罷萬一接交旨意以後帶領他們進京急走的緣



故告訴將軍 朝鮮人等若是已徑打外路來了就打  
這麼由熱河來罷若是已徑打內路走進了關往京裏  
來亦不必從新打這麼來直打那麼進京麼又告訴將  
軍從瀋陽過的日子道路計其遠近走不可只是住著  
因為這樣從衙門派官員四十五義州出派的官員同  
給文書必定恭敬從旨意把 朝鮮人等不必催領住  
他們自己去罷因為這樣特諭乾隆五十五年七月初  
七日自六月晦大雨後遼門內外山路盡為衝破大凌  
河左右沮洳墊溺又甚於遼野縱欲無程勢無奈何已

到初九熱河尚餘六百里墜前得達亦未可必三使相  
對茫然沒策今得勿催領之皇旨庶可便意前進矣

十日戊子朝晴夕陰炊飯于大營子秣馬于三家兜止宿  
于喇嘛溝是日行七十五里大營子以西始脫大凌河  
左右泥淖而阜陵漸高途多由斜坡遂捨車乘馬揮却  
牽夫引轡揚鞭快快的走便覺耳邊生風自大營子至  
熱河晝皆乘馬夜則坐車向過新民屯聞是冀北都會  
為慮口外山路之崎嶇買具鞍馬一匹性甚馴良步品  
亦佳在途騎三百餘里熱河圓明園燕京宴筵出入亦

用此焉○喇嘛溝西四十里為担杖溝梁担杖溝梁以東為朝陽縣界以西為建昌縣界

十一日己丑朝陰夕晴炊飯于公營子止宿于夜不收是日行九十里按乾隆御製癸卯集夜不收在明季為軍營偵探人之俗名其時或於此地遣人訪伺敵情夜行晝伏後遂以名村○自朝陽至此山勢稍峻而阜陵逶迤秀麗處處閑豁民戶愈稠而耕農益勤地無數坪之不墾邨無數里之斷相想是熱河漸近而然帝王所居造化隨之孰謂口外之荒漠也大抵六臺以後邑治都



會則商旅輻湊市廛擲比水草豐饒則馬牛羊駝千百  
為羣以漢滿蒙三國之生聚百餘年不見兵革而農賈  
畜牧舉無遺利安得不殷富蒙人寡多滿人次之漢人  
又次之而蒙俗質樸尚有混沌未鑿底意待人接物純  
是誠款苟使賢者教導之觀感變化當勝於南方諸番  
昔元世祖以許魯齋衡為國子祭酒親擇蒙古弟子俾  
教之魯齋聞命喜曰此吾事也國人于大朴未散視聽  
專一若置之善類中涵養數年將必為國用語載元史  
以古視今天之生才固不限於華第也

十二日庚寅晴東北風甚緊涼意頗生炊飯于張鬚子渡  
大凌河止宿于建昌縣學是日行六十五里建昌邑治  
在大凌河西北而山勢比朝陽尤峻拔開野不過十餘  
里亦以新設故無城池而官府市廛與朝陽等自公營  
子至此路始平坦車可驅馳到縣日尚早而因車馬交  
替留宿○建昌縣明為原顏衛界清初設塔子溝廳乾  
隆丙申陞為建昌縣隸承德府○知縣具盤飧以待三  
使而饌品甚盛羊豕鴨三羹味最佳每到地界則甲軍  
及土卒護行到站亭則口糧馬柴及饌物脩送到邑治

則修掃公館而迎接義州以西沿途諸邑皆然唯具盤  
飧以待則義州建昌而已山海關內外驛站我使逐年  
經由故糧柴餼物一依會典所載頒給而我使之由口  
外今始有之故諸邑接待之殷厚供饋之豐潔比前迥  
殊○舉燭後軍機大臣和珅送其從弟軍機章京某言  
于余等曰向聞使臣擬於七月旬前後來到熱河云而  
皇上特念時值潦暑泥道艱險乃有勿為催行之諭未  
及初旬勢所固然不知今到何地方而若在四百里以  
內則數晝夜無程足可於望日到此大慶宴禮寔在十



六望日得達十六日叅宴為可云云故余荅曰俺等在  
鳳城邊門恭承皇上聽自便勿催行之恩旨而為仲小  
邦慶祝之忱必欲赴初旬宴筵不向山海關徑出口外  
然纔經暴雨平野則墊溺山路則衝破或車或騎僅到  
建昌而期限已過悚息罔措今荷閣老垂念勞足下於  
數百里外指揮中勤誠不勝感戴謹當如戒趨程云云  
到熱河後聞諸通官徐啓文則六月晦間皇上三問  
朝鮮使臣何時可到云和閣老之專人指揮想必因此  
也使首譯洪命福往復知縣整齊車馬翌日黎明離發

義州車馬則並還之

十三日辛卯晴炊飯于宋家庄秣馬于雙廟炊夕飯于北  
宮仍為發行翌日黎明到楊樹溝是日晝夜無行為一  
百三十里宋家庄及北宮丘陵少而坪野多道皆平坦  
雙廟及楊樹溝山峻谷長路甚崎嶇楊樹溝以西始漸  
開豁○自楊樹溝西行五里有古煙臺烟臺以東為建  
昌縣界以西為平泉州界

十四日壬辰晴炊飯于大廟站暫歇于平泉州踰鳳凰嶺  
炊夕飯于七溝仍為發行踰祥雲嶺翌日黎明到西六

溝是日晝夜兼行為一百四十里平泉州治在甘瀑河  
西岸鳳凰嶺東三十里亦以新設故無城池而依阜臨  
水地界夾谿間井櫛比市廛綿亘數里繁華佳麗與義  
州相埒初聞知州已備待車馬及八州自官添給盤纏  
于建昌車夫等仍使前進人馬周頓甚妨於催程○平  
泉州明為平顯衛界清初設八溝廳通判後改為八溝  
同知乾隆丙申陞為平泉州隸承德府○七溝前後數  
十里間有皇莊五六所峻宇高牆包絡川原聞守莊人  
言每歲納稅視土品之饒瘠秋成之豐歉或粟或銀其



等不一而足諸盛京官莊則所徵尤薄云○自七溝西  
行十五里有祥雲嶺嶺以東為平泉州界以西為承德  
府界熱河雖嶺一百一十五里嶺上有交界碑

十五日癸巳晴炊飯于黃土梁子踰紅石嶺秣馬于平臺  
子申時達承德府熱河是日行九十里自黃土梁子山  
皆磅礴奇崛始成絕峽而峭嶂峻嶮純是疊石橫文箇  
箇沈檀色或穹窿如闕或週遭如城或如浮屠或如圭  
瑞至紅石嶺嵯峨森嚴之氣勢上薄雲霄可謂大觀石  
錄熱河在嶺底三十里余與正使書伏到熱河東五里

關帝廟少憩啜茶通官徐啓文來迎且傳禮部滿侍郎  
鐵保言曰各國使臣皆親呈表文於御前貴國亦於  
明日宴筵親呈為可云故遂不造行在禮部直入寓館  
蒙古諸部及回部王貝勒緬甸及南掌使臣臺灣府生  
番是月旬前到此安南國王及從臣是月十一日到此  
云熱河形勝金湯諸山磬嵒彌勒諸峰迴抱拱揖中開  
數十里平峪而灤水熱河左右環繞北壓蒙古南臨宣  
大西連回部東通遼瀋實塞外之輿土而天下之上游  
也清聖祖始朔山莊募民萬家以實之

聖祖熱河詩有  
乘民至萬家之

句每四五月駕幸八九月駕還燕都古北口內外四百

餘里間行宮獵圍錯落相望昔元世祖以燕為大都開

平府為上都四月迤北草青駕幸上都避暑八月草枯

駕還大都歲以為常

上都以避暑故多涼亭有東涼亭西涼亭北涼亭

山莊之

扁曰避暑本於此也今皇帝繼志述事五十餘年生聚

教訓閭井櫛比商賈輻湊酒旗茶旌十里輝映彈吹之

聲徹宵不休康熙間萬家今為數倍不待四方之徵召

已藏數萬精甲亦可謂富且庶矣然聖祖居是幾務多

暇日召儒臣魏廷珍王蘭生等講究律曆又手編朱子



全書馳驛問難於熊賜履李光地蓋不弛武剋而亦不  
懈文教也余留熱河屢日但見伶優角觝為一大事未  
聞儒臣之晉接何也○承德府漢為要陽白檀二縣屬  
漁陽郡後魏為安樂密雲二郡遼界唐為奚地遼置北  
安州興化軍屬中京大定府金改興州寧朔軍屬北京  
路元中統間改屬上都路明為京顏衛地清初稱熱河  
康熙間初避暑山莊雍正間置承德州乾隆丙申陞為  
承德府城週三十里內有獵圍行宮城南一門曰灝正  
即朝臣啓事外藩入覲之道行宮正殿曰勤政即皇上

臨朝視事之所又如獅子林如意湖萬樹園蘋香泥簇

奇廊延山樓水月精舍天籟書屋松霞室文津閣等諸

勝景皆在城內

城用石築因山高下而週繚以護行宮而已閭井市廛則皆在城外設河

屯協副將一駐劄喀喇河屯

在熱河南四十里即古大興州地

統轄左

右營及八溝營唐三營而受節制於古北口提督直隸

總督左營中軍都司一千總二把總五兵四百八十八

名右營守備一千總二把總四兵二百七十五名左營

駐劄喀喇河屯右營駐劄土城子八溝營都司一千總

五把總七兵四百三十五名唐三營守備一千總二把

摠三兵二百七十四名八溝營駐劄八溝屯唐三營駐

劄唐三屯

八溝營即東河汛所屬七汛曰七溝曰二溝曰中六溝曰丁頭溝曰龍鬚門曰暖泉曰茅

溝皆在府東界唐三營即西河汛所屬九汛曰十八里臺曰喀喇河屯曰七間房曰刺麻洞曰紅旗營曰大店

子曰肅什哈曰馬園子○磬嵯山在府西本名棒嵯崖

清聖祖賜名磬嵯山一峰矗然倚天高數百丈夕陽西

映住金碧色彌勒峯在行宮前形如彌勒亦名羅漢峯

灤河在府南源出獨石口外西北流折而東北經舊開

平南又東南會熱河過上板下板城會清河柳河瀑河

入潘家口自發源至八口約行千四五百里熱河在府



東有三源一出府東北曰湯泉一出府北曰墨里河一出府西北曰十八甬台河三水會而南流折而西又轉南繞行宮前又南入灤河○自瀋陽新店由九關臺至熱河道里東人之所不知故付錄于左以脩後考起新店過白臺子至正安堡五十里至陞山舖十里至四方舖十里至四堡子十里至魏家嶺十五里至花兜樓十里至黃土坎十里至細河十里至關帝廟站五里至高臺子二十里渡沙河至廟口站二十里渡大凌河至義州城三十五里至崔家口二十里至頭到河子十里至

六臺邊牆二十五里渡柳河至石人溝地藏寺五里至  
水邨子三十里至蠻子嶺二十里過張家營至鱗牛營  
福寧寺二十五里至大凌河二十五里至朝陽縣十五  
里至大營子二十里過蝴蝶溝至三家兒三十里至喇  
嘛溝二十五里至杏胡子臺十里至担杖溝梁三十里  
至公營子二十里至夜不收三十里至張鬍子三十里  
至建昌縣三十五里至宋家莊三十里至雙廟二十五  
里至北宮四十里至楊樹溝三十五里至大廟站二十  
里至平泉州三十里至鳳凰嶺三十里至七溝二十里

至祥雲嶺十五里至西六溝二十五里至黃土梁子三十里過紅石嶺至平臺子三十里至熱河承德府三十里凡九百七十里

燕行紀卷一





燕行紀卷二

起熱河至圓明園

十六日甲午雨留熱河曉通官徐啓文奉表咨引三使歷  
數三衢衙向北行出大市街布石皇道橫亘東西而宮  
城迤邐皇道北因城為闕門三間扁曰避暑山莊聖祖  
御筆也闕外東西各安石獅南立華表自闕門遵皇道  
東行數百步為麗正門通官引余等入門外朝房暫憩  
啜茶黎明入麗正門折而東行數十步又有門內即數  
百間廣庭而翠幕彌滿幕上皆書各部院號余等暫憩

禮部幕中俄而滿侍郎鐵保德明來立幕前余於辭陞  
時既承 聖諭俾於到京後或以言語或以文字詳傳  
感祝皇恩之意於禮部諸閣故錄成一本與正使書狀  
偕進兩侍郎前使通官替告曰俺等有所欲達之語而  
通官傳語易致爽實茲用小簡書告幸閣下留神兩侍  
郎點頭曰以文字往復甚好正使袖出以呈其文曰小  
邦偏蒙皇上庇覆涵濡之仁前後異數爰越今古乃以  
藩服之嗣續屢煩聖諭之鄭重至有俟得于嗣即行奏  
明冊封世子用延國慶之皇旨及夫本年元正又頒福



字宸翰以寓箕疇歛時錫極之義惟我 國王殿下與  
一邦臣民北望雲天稽首攢手恒切感戴頌祝之誠鄙  
等起程時 國王殿下諄諄教飭曰皇上思造如天報  
答無地表奏體嚴雖不敢畢陳微悃而爾等如拜禮部  
大人啓告予日夕感頌之心鄙等既承 王命故不避  
猥越謹此書達而皇恩所暨景貺已周果於本年六月  
國王殿下有斯男之慶此實皇上收賜也小邦臣民之  
情惟在遙承華誥早定位號而 國王殿下於事大享  
上之節必欲致敬盡禮故咨文中附陳稍待拜跪成禮

然後仰請封典之意矣兩侍即覽訖舉手曰認得矣余  
曰願以書意導達於薨纘荅曰當如戒余等仍隨兩侍  
即向北行踰二門到演戲殿西序夾門外朝房暫憩少  
頃殿上樂作鐵侍即使余等隨後自擎進賀表由西序  
夾門入殿遶殿為二層而橫七間下層正中一間為御  
座而洞開南牖左右六間闕以雕窓障以琉璃觀光之  
妃嬪來往於牕內供給之中官簇立於牕外殿東西各  
有序數十間即宴筵排班處殿南有三層閣竄上層扁  
曰清音閣次層扁曰雲山韶護下層扁曰響叶句天即

作樂設戲慶殿階左右列盆花盆松堦南安古銅大鑪  
升沈香烟軍機大臣和珅福長安王杰因召旨趨進和  
珅謂鐵侍郎曰表文親呈雖有他國已例更待皇旨親  
呈為安且導使臣等先進殿避鐵侍郎還傳進賀表於  
通官使等待于西序夾門外引余等立于殿陛下西邊  
和珅福長安王杰陞殿內侍立于御座東和珅出傳皇  
旨曰 朝鮮使臣等進前鐵侍郎引余與正使書狀進  
跪殿陞上向御座皇旨曰 國王平安乎三使叩頭後  
正使對曰荷皇上洪恩平安矣皇旨曰 國王舉男乎



三使叩頭後正使對曰今年元正特頒福字宸翰實屬  
曠古之殊典 國王感戴銘鏤日夕頌祝果然於六月  
十八日舉男此即皇上收賜也皇上笑曰然乎大喜大  
喜的仍詢三使姓名爵秩和珅進御座前手指歷對皇  
旨曰使臣等就宴班鐵侍即引余等坐於各國使臣班  
而首為 朝鮮使次為安南使次為南掌使次為緬甸  
使次為生番班位親王貝勒貝子閣部大臣坐於東序  
重行西向北上而親王貝勒貝子在前大臣在後蒙古  
回部安南諸王貝勒貝子各國使臣坐於西序重行東

向北上而諸王貝勒貝子在前使臣在後卯正六分開  
戲未正一刻五分止戲曰清平見喜曰合和呈祥曰愚  
感蛇神曰文垂鳳彩曰多收珠露曰共賞冰輪曰壽星  
既醉曰仙侶傾葵曰籠罩乾坤曰氤氲川岳曰鳩車竹  
馬曰檀板銀箏曰修文偃武曰返老還童曰芬菲不斷  
曰悠久無疆凡十六章有扮仙佛者有扮神鬼者有扮  
帝王者節奏聲調隨章各殊而大抵多迂慶祝壽之詞  
或如來莊嚴三十二相跌坐蓮花臺上開方便門闢恒  
沙界則數百羅漢左右簇立戴紫金圓光被錦繡袈裟

螺髻相聯珠眉互映雲間妙音天際法蟲隨梵唄而上  
下或桂父茅君飄霓裳馭雲車逍遙于玄圃大闡三十  
六法則頂金帶玉之仙官被甲仗劍之神將列侍擁衛  
雍雍肅肅以都雅之儀度而兼雄豪之氣像又有仙童  
數百彩衫繡裳折旋進退還丹則西陽鏡而九轉祔籙  
則擎壽扇而層抽齊唱綠玉黃金之曲和笙簫而瀏亮  
或河神海鬼執濤旗而環旋逐逐搖搖氣勢沍湧騎龍  
馭鯨乘楂駕鶴之羣仙汗漫來遊龍騰鯨蛇噴水如雨  
或葦堦三級封人頌嘏于神堯瑤池五雲王母獻桃于



周后珠旒山龍穆穆煌煌

榕村李先地語錄云章服代各異制而惟優人不禁於高

力士者尚戴紫金冠蓋唐制中官必着紫金冠不敢烏紗帽也做那一朝戲即用那一朝衣冠方是名優按今

天下皆遵滿洲衣冠而獨劇演猶存華制後有王者必取法于此

若取前史所載忠孝

節義可以敦風勵俗者扮跡協均感發人心則由今樂

近古樂未必不在此寧比仙佛神鬼之徒為觀美而

已哉宣饌凡三度而第一第三則分御卓

即皇上朝夕膳所排

而撤饌後宣酪茶第二則各具一盤而撤饌後宣清茶

是月有七筵宴而九日十一日十三日已經三宴余等

自第四宴始與馬退自宴班過麗正門內見有獵夫數

十臂蒼牽黃而僉立聞之通官則皇上將與宗室親王  
貝勒蒙回諸王貝勒獮于宮圍云止戲前和珅出取進  
賀表文 邦慶咨文進于御前良久還傳于鐵保曰此  
表咨已經御覽他餘表咨自行在禮部收送于留京禮  
部為可又以表咨展示安南國王阮光平曰字畫整齊  
紙品潔精 朝鮮於事大之節敬謹如此宜作他藩之  
儀式安南王亦屢回看過稱歎不已吏部漢尚書彭元  
瑞問于余曰貴 國有海東秘史東國聲詩二書云可  
得見乎余曰小邦本無秘史有鄭麟趾高麗史金富軾

三國史而今行適未携來詩類則有康熙間所進東詩  
選而已亦無他選或因漁洋王士禛東士解聲詩之句  
而傳會歟彭曰尚書古文真本惟貴國有之云然否  
余曰此齊東好恠之言荒唐正如日本尚書僉今古文  
源委顧亭林辨之極今晚前此諸儒所不能及也彭曰  
亭林博學果稱近世冠冕而經說亦多考證之精詳處  
僉貴國結負法中國頃畝法之同異可得聞乎余曰  
小邦田制十把為來十束為負百負為結而中國田制  
十步為分十分為畝百畝為頃是小邦之結負即中國



之頃畝也然小邦量尺準周尺七尺中國弓尺準周尺  
六尺故一把為正方周尺四十九尺一步為正方周尺  
三十六尺所以結與頃之實積有多少也安南國王阮  
光平問于正使曰貴國亦有親朝天朝之例乎正使  
對曰我東開國以來元無此例俞王曰安南亦自古  
無此例而寡人受皇上天高地厚之恩造誠切覲光不  
憚萬餘里涉險荷非常之數安得無非常之報又問於  
余曰貴國與倭為隣道里幾許余曰自我國京都  
從旱路南至我界釜山一千餘里自釜山從海路至倭

對馬島七百七十里自對馬島從海路至赤間關一千  
七十里自赤間關從海路至淀浦一千四百五十里自  
淀浦從旱路至關白所居之江戶一千三百一十里王  
曰萬曆間平秀吉搆兵以後何為修隣好余曰今之關  
白即源家康之後非秀吉之種也從臣吏部尚書潘輝  
益又問於余曰萬曆丁酉間馮李王河館唱酬真是千  
古奇遇李有詩文集否余曰芝峯我國使李  
時光歸有集而多  
載馮詩及問答矣毅齋安南使馮  
克寬歸亦有詩文集否潘曰  
有集而其萬壽聖節慶賀詩則又載芝峯序文矣余曰

山出異形饒象骨地蒸靈氣產龍香為芝峯之得意語  
而極判洪濛氣區今上下堦亦毅齋之佳句也潘曰芝  
峯詞致醇雅毅齋意匠道健要可為伯仲俞乾隆庚辰  
間貴國書狀李公徽中與我國使多有唱酬尚傳佳  
句不知今做何官余曰李公文詞在東方亦為翹楚已  
佐古人而官止侍郎矣史稱貴國交愛二州多個儻驩  
演二州多文學今如何潘曰不如古也余曰貴國疆域  
東距海西接老撾南通占城北連廣西雲南國內省府  
為幾許潘曰東西一千七百餘里南北二千八百餘里



今今為十六道余曰貴國北極出地為幾度潘曰素不  
習曆象矣余曰貴國天頂近赤道氣候恒熱穀歲二稔  
云然召潘曰然余曰藿香肉桂貴國所產為佳品云然  
召潘曰藿香廣西所產乃為佳品肉桂我國所產果是  
佳品然採桂必于清化地方而近來屢經戎馬境內桂  
林皆成蹂躪之場絕難得佳品矣曾聞安南使臣束髮  
垂後戴烏紗帽被濶袖紅袍拖飾金玳瑁帶穿黑皮靴  
多類我國冠服今見其君臣皆從滿洲冠服而不剃  
頭余恠而問諸潘曰貴國冠服本與滿洲同乎潘曰皇

上嘉我寡君親朝特賜車服且及於陪臣等然又奉上諭在京叅朝祭用本服歸國返本服此服不過一時權著而已語頗分疏面有愧色各國使臣到京例自光祿寺頒給口糧饌物果色而行在所無光祿寺故各國使臣及從官從人皆自內務府具盤飧以送饌品極其豐潔曰皇旨云○滿洲冠服之制皇帝有禮服采服常服凡禮服暖冠緣以玄狐青表朱裏涼冠緣以纁錦素表朱裏均覆朱緯纓用青組或稱緯笠施金龍頂高四重上用玼珠一下三重貫東珠三為龍十有二間珠如龍

數涼冠刻金佛飾東珠綴冠前鑾金為舍林飾東珠綴冠後服色南郊用青北郊用黃東郊用赤西郊用玉色朝會用黃有披肩腰襍積前後正幅如帷脩十二章施五采襟袍及袂緣以金花青繒冬緣以貂裘服色用青長覆膝織金為卷龍文四大裘如袞龍制長裾深袖表以玄狐為之帶用黃組南郊施青金方石四北郊用璠珀東郊用珊瑚西郊用白玉宗廟朝會用綠松石均銜金綴珠帶下左右銜金環佩囊影帛各二朝珠用東珠凡采服冠頂二重頂端銜珎珠一服用龍袍色尚黃裾



四啓脩十二章施五采襟袂龍文青綺緣以金花青繒  
帶用各色寶石朝珠以雜寶及諸香為之凡常服冠用

結線頂袍色尚黃亦用諸色表衣用青均不施章采織

文用卷龍及各色花文

右皆皇帝冠服

凡王公朝服親王至八

八分公冠頂三重上用紅寶石中飾東珠冠前綴舍利

冠後綴金花均飾東珠服用滿翠龍文繒襟袂緣以金

花繒冬緣以貂補服親王用圓龍文四前後正龍左右

旁龍世子郡王旁龍圓文四長子貝勒貝子正蟒圓文

二鎮國公輔國公正蟒方文二表裘得用玄狐帶用金

黃色組施方玉四銜以金飾以貓睛石及東珠民公侯  
伯冠頂均上用紅寶石中飾東珠服得用貂緣及蟒繡  
金花采繒補服用方蟒文二表裘用貂帶用圓玉四銜  
以金公飾玉以貓睛石侯綠松石伯紅寶石采服王公  
侯伯均冠頂二重王公頂用紅寶石民公侯伯頂用珊  
瑚服王公宗室裾均四啓親王世子郡王用龍文采繒  
貝勒貝子公用蟒文采繒民公侯伯裾啓前後均用蟒  
文采繒襟袂緣以金花繒常服親王至八八分公冠用  
紅寶石頂袍色用藍間用諸色表衣用青均不施章采

織文親王世子郡王貝勒用龍文貝子公用蟒文民公

侯伯冠用珊瑚頂袍用蟒文采繒

右皆王公冠服

凡品官朝服

一品至八品均鑲金為頂一品上用紅寶石中飾東珠

二品用鑲花珊瑚中飾紅寶石三品用藍寶石中飾如

二品四品用青金石中飾藍寶石五品用水晶中飾如

四品六品用硨磲中飾如五品七品用素金頂中飾水

晶八品用鑲金頂九品用鑲銀頂服自一品至三品得

用貂緣及蟒繡金花采繒七品以上得用金花采繒八

九品用素繒領袂均得用蟒繡金花繒補服文職一品



用鶴二品錦鷄三品孔雀四品鴈五品白鵬六品鷓鴣七  
品鸛鷖八品鷩鷮九品練雀武職一品用麒麟二品獅  
三品豹四品虎五品熊六品彪七八品犀牛九品海馬  
御史按察使均用獬豸貂裘四品以上及翰林科道官  
用之帶一品用金銜方玉四各飾紅寶石二品鏤金圓  
版四飾如一品三品鏤金圓版四四品銀銜鏤金圓版  
四五品銀銜素金圓版四六品銀銜玳瑁圓版四七品  
銀圓版四八品銀銜明羊角圓版四九品銀銜烏角圓  
版四米服冠頂均二重一品頂用珊瑚二品用鏤花珊

瑚三品至九品各視朝冠頂服一品以下均裾啓前後  
用蟒文采繒襟袂緣以金花繒常服冠頂均視采服冠  
頂服四品以上官及御前侍從官均得用蟒文七品以  
上用諸花繒八九品用雜花繒及素繒右皆品官冠服凡朝珠  
王以下文職五品武職四品以上及翰林科道官均得  
用以雜寶及諸香為之凡孔雀翎翎端三圓文者貝子  
戴之二圓文者鎮國公輔國公和碩額駙戴之一圓文  
者內大臣一二三四等侍衛前鋒護軍各統領叅領前  
鋒侍衛均得戴之凡佩囊影帛左右垂帶下為飾王公

百官咸用之○朝貢蒙古曰科爾沁明初為扶餘外衛以元後元良哈部

長揆都指曰扎賴特曰杜爾伯特曰郭爾羅斯元時皆為遼王

其弟乃於科爾沁之外分三部落曰教漢元時為遼王分地明為喀

爾喀兩據後分與曰奈曼遼金為興中府北境明為喀爾喀兩據後分與其弟節曰

泰曰翁牛特明初以元良哈部長置衛曰巴林明初為

北境後為巴林所據巴林台古者順義曰扎魯特即元王俺答第五子與喀爾喀為兄弟行

都路明初為曰喀爾喀左翼即金之北京路明曰阿祿

科爾沁明初於元良哈地置衛為曰克西克騰元屬上都及應

察哈爾兩據曰土默特明初為泰寧衛後曰喀喇沁明



樂初以大寧地賜三衛部長原額敏強後為察哈爾所滅以其地予塔布囊是為喀喇沁曰烏朱穆

泰元屬上都路明為察哈爾曰阿霸拔元屬上都路明

是為阿曰蒿齊忒元屬上都路明為察哈爾曰蒿齊忒曰蘓尼特

元屬興和路明為察哈爾曰阿霸哈納爾元屬上都路

所據是為阿曰四子部落元屬大同路明為阿祿科爾

為四子部落是曰喀爾喀右翼元屬大同路明曰吳喇忒

元屬大同路明初為厄喇曰毛明安元屬大同路明初

明安曰鄂爾多斯元屬弘治間為火歸所據嘉靖中俺答

吉驛破火歸居此曰歸化城土默特元屬大同路明嘉

是為鄂爾多斯

豐州灘抹木架屋以居謂之板升隆慶間封俺  
答為順義王名其城曰歸化是為西土默特凡二十

五部分為五十一旗疆域東至盛京黑龍江西至厄魯  
特南至長城北至朔漠袤延萬有餘里封爵有親王郡  
王貝勒貝子鎮國輔國公五等秩視宗藩是月來朝與  
宴者科爾沁右翼和碩土謝圖親王左翼和碩達爾漢  
親王土默特左翼多羅達爾漢貝勒右翼固山貝子喀  
喇沁右翼多羅杜稜郡王左翼貝子翁牛特右翼多羅  
杜稜郡王左翼多羅達爾漢戴青貝勒巴林右翼多羅  
郡王左翼固山貝子蘓尼特右翼多羅杜稜郡王左翼

多羅郡王四子部落多羅達爾漢郡王

親王郡王貝勒貝子凡十三

朝貢回子曰哈密

元為族于納忽禮封地明永樂初內附設哈密衛成化後為吐魯番所據

曰開展吐魯番

唐吐蕃地

曰哈拉沙拉

古為焉耆國地

曰庫車

古為龜茲

國地曰沙雅爾曰賽里木曰拜曰阿克蘇曰烏什曰喀什

噶爾曰葉爾羌曰和闐

右八部皆蔥嶺以東天山以南地而未詳沿革凡十二

部哈密開展吐魯番二部為嘉峪關以外舊疆哈拉沙

拉等十部為嘉峪關以外新疆封爵有郡王貝勒貝子

伯克而伯克之秩以三品至七品為差是月來朝與宴

者烏什多羅郡王哈密岡山貝子

郡王貝子凡二

又有青海西



藏等國皆隸版圖奉正朔惟謹青海即唐宋之吐蕃地  
而元明之朶甘思西蕃地西藏亦唐宋之吐蕃地而元  
明之烏思藏地也青海貢物有藏香以出於西藏故名  
回部冠服亦遵滿洲制而從官或戴黑質花文氎笠高  
尺餘左右簷如卷荷南北簷長而尖服仍滿洲或著兜  
鍪穿紅綠斑布表衣烏什王與余等寂親熟而王聰穎  
異常能為漢清蒙三國話每日朝房遇檢書等則王為  
回回話檢書以東 國字譯之檢書為東 國話王以  
回回字譯之質以漢音變幻成誦回回話天曰阿斯華音

曼地曰脂

音華

民曰曰苦

音華

雲曰曰

穀國曰

社兜

音華

國王

曰穰

音華

社父曰

阿陀

母曰

阿那

兄曰

握何

弟曰

郁何

一

曰飛

音華

乙二曰

伊欺

音華

三曰

由置

四曰

得

音華

於

五曰

氏六曰

謁置

七曰

如置

八曰

朔可

音華

斯九曰

吐沃

顓

音華

斯

音華

十曰

溫坐

曰兀

吐請

坐曰

兀吐

籠前

來曰

乙

起來

曰姑

邑喫

飯曰

阿施

阿睡

着曰

于候

羅年

紀多

少

曰千

且耶

施多

爾名

甚麼

曰阿

稱欺

音華

任

又曰

阿

稱

尼

麻好

曰若

施好

麼曰

若施

無平

安曰

真置

平安

麼曰

真

置無

○安

南王

阮光

平初

名惠

安南

世族

也居

廣南

為田舍生因黎氏衰弱嘯聚亂民攻陷王都遂弑其王

而篡位世于黎維祈與其母逃難至廣西告急請援該

省總督福康安以聞皇帝命該省將軍孫士毅發兵討

之收復王都阮惠敗走廣南

李鼎元和孫中丞南征詩注曰匪惠既敗奉牛酒犒

師公却之

乃封黎維祈為安南國王詔士毅班師惠聞官兵

既撤復大舉圍王都維祈棄宗社出奔匿于民間惠入

據王都改名光平輦金銀珠貝以啗福康安於是康安

奏光平誠心歸附維祈怯懦不堪皇帝覽奏赦光平罪

詔曰安南雖僻處海隅然其興廢亦關氣運黎維祈優



柔廢弛天已厭棄朕辦理庶務無不順天而行阮光平  
悔罪投誠情詞肫切且稱明年親自來京恭祝萬壽又  
為陣亡天朝將士等壇奠祭尤見小心恭順黎維祈已  
棄印潛逃自無復令立國之理即遣官勅封阮光平為  
安南國王又召舊王黎維祈授叅領武職三品並親屬從臣  
九十戶隸漢軍旗下治第安定門外以處之其實為光  
平錮其君臣也黎氏自永樂受封三百餘年君臨交趾  
惠澤之入人厥惟久矣維祈之失國不過委靡不振而  
已光平弑逆之罪王法所必誅而一朝變置宗社太容

易彼交南數千里亦安知無忠義慷慨之士  
如萬曆間黎維潭之除去莫茂洽也今年三月  
光平自安南起程四月到廣西皇帝遣禮部侍郎  
德明迎之又命內閣議定安南王上京時沿途  
官員相見儀注七月光平率臣僚謁從一百八  
十四人到熱河貢獻純金鶴一隻純金麒麟一  
隻明犀五對象牙十對馴象一隻肉桂一百斤  
沈香一千斤他餘奇玩不可殫記又進安南樂  
工數十人以助劇演皇帝大加褒美待以殊禮  
命光平及從臣縱觀行宮七十二景

聖祖平定原為三十一  
景皇上人續定三十六

景御製七言律一首御書拱極歸誠四大字并御製集

二十箇賜光平又以親王車服賜光平以五品官朝服

賜從臣封光平長子光纘為世子

黎氏以維字傳世故  
阮氏亦以光字傳世

駕還圓明園皇帝召見光平則福康安必於門外附耳

語移時指導奏對及陞殿陞又牽衣指導坐立跪叩之

節或私接於朝房則康安立語而光平跪答諂鄙之態

無所不為余於宴筵與安南王及從臣吏部尚書潘輝

益工部尚書武輝璫等每日聯班或有酬酢和坤之子

為皇上第十一額駙者輒謂余曰安南人決不可深交



又聞檢書等所傳刑部郎中某在朝房指安南從臣之  
過去者而罵曰阮光平真逆賊此輩皆黨與也可見士  
大夫之拂鬱而亦可揣和福之間不能相協也光平骨  
格頗清秀儀容亦沉重似是交南之傑然者從臣則雖  
稍解文字而軀材短小殘劣言動狡詐輕佻屢言於余  
曰新王本為廣南布衣於黎氏無君臣之義又言新王  
宮室皆仍黎氏之舊歸國後不可不改其扁額又言渠  
輩亦不仕黎朝今之爵秩皆新王所賜語刺刺不休蓋  
中有所忸怩也太和殿賀班夕月壇祭班始見其所謂

本服則其王頭匝網巾戴七梁金冠身穿絳色龍袍束  
白玉帶從臣亦匝網巾戴五梁烏帽穿蟒袍而色或用  
青或用紫束金帶袍文駁雜詭恠類倡優服與安南古  
制判異又安南古為十三道而今分為十六道皆新王  
之所變更云○南掌古越裳氏地自周以後不通中國  
明永樂間始入貢置老撾軍民宣慰使司或稱撾家嘉  
靖間緬人破其東之攢掌亦名南掌其疆域東至水尾  
界南至安南界西至寧遠界北至車里界其酋長有三  
等一曰招木弄次曰招木牛次曰招木化清雍正初南

掌國遣頭目以猛花等奉表貢象是月使二人從者十  
三名到熱河其使臣冠服椎髻在腦戴紅檀方冠高尺  
餘垂後二尺餘飾緣以金絲及珠貝穿紅蟒繡綠羽緞  
衣狹袖右衽其從者冠不飾珠貝而畫雲文服用雜絛  
其狀貌皆短小鰲黑眼視狠毒足底頑如木根渾身刺  
蛟龍虎豹文問其使臣官名則正使答曰一評二評一  
世撫二世撫三世撫四世撫云所謂一評二評似是一  
品二品之訛而正使屢來中國粗曉漢語故杜撰為對  
也余聞檢書等言一日朝房蒙古王踞炕上俯視南掌



使而微笑南掌使以狼眼仰視一則有鐵馬蹴踏之氣  
一則有深箐中放毒箭之意云亦可謂奇觀也○緬甸  
古朱波地宋寧宗時緬甸波斯等國進白象始通中國  
元至元間明洪武至天啓皆遣使進方物其國在雲南  
西南窳窮遠有城郭廬舍多樓居清乾隆十六年緬甸  
始遣使臣希里覺填等奉表進馴象是月使四人從者  
二十四名到熱河其使臣冠服椎髻在頂以織金緞纏  
頭結於髻止垂後五寸餘穿赤繡蔓花綠質蜀衣挾袖  
右衽嵌錫筒于耳輪前後通孔其從者以紅錦纏頭服

用雜綵嵌黃楊筒于耳輪其狀猶短小鰲黑身刺蛟龍  
虎豹文皆如南掌問其使臣官名則正使書示有曰便  
氣未駝曰便氣覺抓曰細立覺抓曰南達趙素又問其  
國山名水名則正使書示曰無山都是平野而水有金  
沙江此皆緬甸使以銀管滑石尖筆書緬甸字于煤帖  
上自左而右類回回字而緬甸通官譯言於余也檢書等訪于緬  
甸館則所謂正使便氣未駝者開朱盒出示金指環銜  
以青寶石便氣覺抓者伸指示銀環銜以紫寶石云似  
是辨官品之物也○臺灣即明之鷄籠山在澎湖嶼東

北故名北港又名東畚地多深山大澤聚落星散無君  
長有十五社多為千餘人少或五六十人構屋以竹覆  
以茅不知曆日文字以草青為歲首不食鷄雉但取其  
毛為飾俗尚勇習走足皮厚數分履荆棘如平地日行  
屨百里性畏海不善操舟老死不與隣國往來明永樂  
間鄭和徧歷東西洋靡不獻琛恐後獨東畚避不至和  
惡之家貽一銅鈴俾掛諸項蓋擬之狗國也其後人反  
寶之富者至綴數枚曰此祖宗所遺嘉靖間為林道乾  
所據萬曆末為紅毛荷蘭所據通市舶設關闕等赤嵌



城始稱臺灣清順治間鄭成功逐荷蘭偽置東都僭王

康熙癸亥靖海將軍施琅平定鄭克塽設臺灣府隸于

福建省軍民皆薙髮從滿洲冠服而如傀儡山在鳳山縣東南

界土番所居呼為加嘮山朝山在彰化縣東北山南為生番三十六社居蛤仔

灘地人跡罕到又南為浪嶠南嶼在鳳山縣南土番所居多瘴氣鬼魅南

謚東嶼在鳳山縣東南亦土番所居等散處之番人各自從其舊俗

其疆域自府治東至大山番界五十里西至彭湖島海

五十里南至沙馬磯頭海五百三十里北至鷄籠城海

二千三百十五里其水程自臺灣港西至彭湖嶼順風

四更自彭湖西北至泉州金門順風七更自木岡山東  
至日本順風七十更東北至我國湖南界順風四十

更

海道不可以里計舟人分一晝夜為十更

乾隆丁未林爽文敗遁于臺灣

生番等邀擊擒獻事具熱河文廟紀功碑是月生番十

二人到熱河其冠服剪髮覆額刺卦文于眉間或額上

戴紅質青繡冠穹窿如覆盆四圍有簷上加齟齬梁梁

上挿飾鷄羽即鷄籠十五社舊俗簷左右各懸小鈴三

枚即三保太監所遺也裹著狹袖右衽綠長衣表著狹

袖中衽紅罽金線綠短衣項懸木牌書所居社名及人

名有曰中路多蘿大埔社投旺南路望仔立社均力力  
北路末篤社囉沙懷祝北路屋鰲社也璜哇丹北路獅  
子社懷目懷其餘不記所著冠服皆自臺灣府仍渠本  
俗而製給云

十七日乙未晴留熱河曉通官引三使到灑正門外朝房  
暫憩黎明通官引余等入演戲殿西序夾門外朝房暫  
憩少頃皇上御殿通官引余等就宴班叩正三刻開戲  
未初一刻五分止戲曰稻穗麥秀曰河苗洛書曰傳宣  
衆役曰燕衍耆年曰益友談心曰素娥絢綵曰民盡懷



忱曰天無私覆曰重譯來朝曰一人溥德曰同趨禹甸  
曰共醉堯樽曰煎茗逢仙曰授衣應候曰九如之慶曰  
五嶽之尊凡十六章宣饌宣茶皆如昨日儀止戲前閣  
老和紳領欽賜各種頒于叅宴諸臣自和碩親王至使  
臣等每品應受各種分盛于黃函書每頁爵秩姓名于  
粉牌牌長七寸廣二寸厚二分  
首刻蓮葉綠恭下皆粉恭置函中列函于東西序  
階上和紳按牌呼名立階下授之諸臣跪受一叩後還  
班余與正使各緞五疋荷包三隻鼻烟壺一箇漆梳一  
箇書狀官緞四疋荷包二隻鼻烟壺一箇漆梳一箇每

日朝膳後太監自御前出召軍機大臣和珅福長安王

杰等入對以內部外省奏牘翻滿洲字盛于黃櫃櫃長八寸

廣四寸糊紙為片塗以黃錦粧以白銅

太監擎隨大臣後進御前大臣面

奏得旨輒移數時而退奏牘多則為四五十櫃少亦為

十餘櫃○鐵侍郎示其熱河詩一卷求評且索余所著

書行中無他攜帶者以渾蓋圖說集箋二卷送之

十八日丙申晴留熱河曉通官引三使到麗正門外朝房

暫憩黎明通官引余等入演戲殿西序夾門外朝房暫

憩少頃皇上御殿通官引余等就宴班卯正十分開戲

未正二刻止戲曰寶璫凌空曰霞觴湛露曰如山如阜  
曰不識不知曰天上文星曰人間吉士曰花甲天開曰  
鴻禧日永曰五色抒華曰三光麗彩曰珠聯璧合曰玉  
葉金柯曰山靈瑞應曰農政祥符曰瑤池整轡曰碧落  
飛輪凡十六章宣饌宣茶皆如昨日儀就班後禮部侍  
郎鐵保謂余曰安南王 朝鮮使臣有召旨宜進待殿  
陛下遂引余等立於殿陛下西邊先召安南王少頃而  
退和珅出傳皇旨曰 朝鮮使臣登筵余與正使書狀  
進跪殿內御榻前相距未滿一間皇上御常服坐沉香



榻上榻高二尺餘上布淡黑質花紋氍毹後倚沉香屏  
刺山水雲物榻前布深黃質彩花紋氍毹左右卓上錦  
軸牙籤數百卷皇旨曰爾等適當溽暑由口外來不服  
水土道路艱辛何以得達余與正使書狀叩頭後對曰  
賴皇上洪恩無擾得達矣皇旨曰爾國有滿洲蒙古話  
者乎正使對曰陪臣等行中亦有帶來者而皆自盛京  
直向燕京矣皇旨曰戲畢後朕當回鑾爾等可先往京  
都等待仍命就宴班鐵侍即引余等出○宴退訪鐵侍  
即于寓館茶沸香清簾几滿灑架有明詩綜佩文韻府

余曰拜昨和中堂先進進賀表文封典咨文于御前或  
因皇旨而然歟鐵曰王中堂具列表咨幾度某事以聞  
有旨取進進賀表封典咨也余曰封典咨文即小邦至  
重至大事貴部將何以請旨鐵曰王中堂管理禮部故  
拜昨已面奏得旨著照咨文所請矣余曰然則貴部回  
咨何不成送鐵曰回咨則例於貴行起程前數日完送  
爾余曰貴稿前夜略綽看過氣格通高意致醇雅句法  
字眼皆出性靈之自然以漁洋之清切兼牧齋之綺麗  
非俺等管見所可窺也鐵曰僕於詩學志勤而才踈果

好王錢詩而未躡其藩籬之下推獎太過愧甚愧甚余  
曰昨所奉質渾蓋面說集箋果無疵類否鐵曰僕粗解  
詞章而已至於律歷真是瞽者之丹青何敢以叩盤捫  
燭之見強為之評乎第觀其繪圖立說亦可知專門絕  
藝也余曰方今宰相中精於律歷者為誰鐵曰有翁閣  
學方綱李閣學演而翁則見在盛京考校四庫全書李  
則見在京裏余曰閣下與翁李皆有雅分乎鐵曰俱親  
熟矣再昨彭尚書所問聲詩貴國果無是書則何為  
傳名於中華余曰王漁洋詩話有曰記得朝鮮使臣



語果然東國解聲詩或者因此傳會聲詩之名歟康熙  
間孫公致稱東來時選進東詩此外別無詩選矣牧齋  
集方為禁書閣下何從得見鐵曰凡禁書之法止公府  
所藏而已天下私藏安能盡去牧齋大質已虧人固無  
足觀而詩文則必不泯於後也

十九日丁酉晴留熱河曉通官引三使到灑正門外朝房  
暫憩黎明通官引余等入演戲殿西序夾門外朝房暫  
憩少頃皇上御殿通官引余等就宴班卯正一刻五分  
開戲未正三刻十分止戲曰壽域無疆曰慈光有庇曰

紫氣朝天曰赤城益壽曰霓裳仙子曰鶴髮公卿曰化  
身拾得曰治世如來曰齊田金闕曰還向丹墀曰偕來  
威鳳曰不貴旅葵曰爰象成文曰灶神既醉曰太平有  
象曰萬壽無疆凡十六章宣饌宣茶皆如昨日儀止戲  
前閣老和紳領欽賜各種頒于叅宴諸臣余與正使各  
磁瓶一箇磁椀一箇磁櫟一箇象牙茶盤一箇書狀官  
磁椀一箇磁櫟一箇象牙茶盤一箇○安南國吏部尚  
書潘輝益工部尚書武輝璫各送七言律一首求和潘  
詩曰居邦分界海東南共向明堂遠駕騶文獻夙徵吾

道在柔懷全仰帝恩覃同風千古衣冠制奇遇連朝指  
掌談騷雅擬追馮李舊交情勝似飲醇甘武詩曰海之  
南與海之東封域雖殊道脉通王會初來文獻並皇莊  
此到覲瞻同衣冠適有從今制縞紵寧無續古風伊昔  
使華誰似我連朝談笑燕筵中余和送二詩各致扇十  
柄清心元十九和潘詩曰何處青山是日南灤陽秋雨  
共停驂使華夙昔修隣好聲教如今荷遠覃法宴終朝  
聆雅樂高情未暇付清談新詩讀罷饒風味頓覺中邊  
似蜜甘和武詩曰家在三韓東復東日南消息杳難通



行人遠到星初動天子高居海既同  
桐酒真堪消永夜  
飛車那得溯長風  
知君萬里還鄉夢  
猶是鈞陳豹尾中  
二十日戊戌朝陰夕晴留熱河晚禮部侍郎德明送言曰  
吾們昨奉皇旨安南王及從臣  
朝鮮南掌緬甸使臣  
等皆令今日謁文廟宜即進待於文廟余與正使書狀  
具公服詣文廟留待於大成門外  
黎明德侍郎先至安  
南王及從臣次至南掌緬甸使又次至德侍郎引班入  
大成殿  
進安南王位於階上  
偏東余等位於階下  
正路  
東安南從臣及南掌緬甸使位於階下  
正路西階行三

跪九叩禮仍陞殿奉審四聖十二哲侑饗正殿先賢先  
儒從祀兩廡一如燕都文廟而先聖位前卓上排列雷  
文爵文王鼎籩簋敦彝聞是御府古器而移來云大成  
殿覆黃琉璃瓦前為大成門後為崇聖祠而尊經閣在  
殿東彝倫堂在殿西兩廡在殿遶左右大成門北階有  
左右櫺星內安石鼓各五座鼓上面模刻燕都石鼓文  
大成門南遶築大湖石為池跨虹橋繞玉欄廟額之宏  
麗潔淨反勝於燕都文廟○大成殿位次先師孔子正  
位南嚮四配復聖顏子述聖子思子東位西嚮宗聖曾

子亞聖孟子西位東嚮東序先賢閔子損冉子雍端木  
子賜仲子由卜子商有子若西序先賢冉子耕宰子予  
冉子求言子偃顓孫子師朱子熹位均東西嚮兩廡位  
次東廡先賢蘧瑗澹臺滅明原憲南宮适商瞿漆雕開  
司馬耕梁鱣冉孺伯虔冉季漆雕徒父漆雕哆公西赤  
任不齊公良孺公肩定鄒單罕父黑榮旂左人郢鄭國  
原亢廡潔叔仲會公西與如邾奚陳亢琴張步叔乘秦  
非顔噲顔何縣亶樂正克萬章周敦頤程顥邵雍位西  
嚮西廡先賢林放宓不齊公冶長公皙哀高柴樊須商



澤巫馬施願辛曹卹公孫龍秦商顏高壤駟赤石作蜀  
公夏首后歲奚容藏顏祖句井疆秦祖縣成公祖句茲  
燕伋樂效狄黑孔忠公西藏顏之僕施之常申張左卹  
明秦冉牧皮公都子公孫卬張載程頤位東嚮東廡先  
儒公羊高伏勝董仲舒后蒼杜子春諸葛亮王通范仲  
淹歐陽脩楊時羅從彥李侗呂祖謙蔡沅陳淳魏了翁  
王栢趙復許謙吳澄胡居仁王守仁羅欽順西廡先儒  
穀梁赤高堂生孔安國毛萇鄭康成范甯韓愈胡瑗司  
馬光尹淳胡安國張栻陸九淵黃榦真德秀何基陳澔

金履祥許衡薛瑄陳獻章蔡清陸隴其位均東西嚮崇  
聖祠位次中設肇聖王木金父左裕聖王祈父右詒聖  
王防叔次左昌聖王伯夏次右啓聖王叔梁紇位皆南  
嚮配饗先賢顏無繇孔鯉東位西嚮曾點孟孫氏西位  
東嚮兩廡位次東廡先儒周輔成程珦蔡元定西廡先  
儒張迪朱松年位均東西嚮○大成門外東辟有乾隆  
四十三年上諭曰京畿東北四百里熱河地方在古北  
口以北即禹貢冀州邊末而虞及殷周幽州之境也秦  
漢以來未入版圖元魏建安營二州唐有營州都督府

然不過僑治於內地遼金及元始薊其名而故址旋荒  
明棄大寧視為別域向曾設承德州今宜陞為府即以  
同知改設其餘六廳如喀喇河屯廳改為灤平縣四旗  
廳改為豐寧縣八溝廳其地較廣改為平泉州烏蘭哈  
達廳改為赤峯縣增子溝廳改為建昌縣三座壩廳改  
為朝陽縣並屬承德府統轄大成門外西壁有乾隆五  
十三年平定臺灣紀曰聞林爽文計窮欲逃入內山而  
生番狙獷未必能喻利害預命福康安既怵以威復賚  
以惠生番等果傾心效命協同官兵社丁人等竟於正



月初四日在老衡崎之地將林奕文生擒解京又曰林  
奕文逃入內山勢已成擒莊大田在鳳山一路窺伺府  
城慮其事急遁海而逸福康安預令烏什哈達帶水師  
絕其去路今已苗魯等為六隊自山梁挨次排下四面  
合圍莊大田立即就擒頭目四十餘無一脫者復斬賊  
衆二千餘名按東辟上諭雖在乾隆四十年陞熱河廳為承  
癸卯集註乾隆四十年陞熱河廳為承  
德府並改六屬廳為平泉豐寧灤平朝陽建昌赤峰六  
邑仍無同知通判原銜隸承德府云據此六廳之陞為  
州縣實在乾  
隆丙申也

二十一日己亥晴踰廣仁嶺渡灤河炊飯于灤平縣秣馬

于王家營止宿于常山峪是日行一百里自熱河西南  
行十里為廣仁嶺十里間却閣所在處阜陵可登處皆  
結綵棚號曰點綴或為城堞峰巒或為畫閣牌樓實用  
木版蘆葦而外施塗堅丹膜華麗奇巧一如西洋制度  
皇道不在大路正中而或左或右惟擇地勢便穩每日  
人給銀八分填砌削凸等土轉磨廣可五間厓坡之側  
橋梁之上必為朱漆木欄以護之道傍或數三間或四  
五間等土為燈臺類陽馬體廣仁嶺都是石壁而康熙  
中間鑿成徑賜名廣仁立碑嶺巔紀之踰嶺西南行十

里有烟臺撥汎及行宮由行宮西南行二十里為灤平  
邑治在灤河西南數百步而亦以新設故無城池然官  
府之宏崇市廛之繁華與平泉等有撥汎及行宮而宮  
苑長闊幾數里粉牆週遭十餘里樹密草茂雉堞成羣  
內有虬蓋亭小金山等諸勝景由灤平縣西南行二十  
里有烟臺撥汎地名馬圈子由馬圈子西南行十里為  
王家營有行宮由王家營西南行十里有烟臺撥汎地  
名三道梁由三道梁西南行二十里為常山峪有行宮  
內有青雲梯楓香坂等諸勝景蓋自廣仁嶺至常山峪



九十里間灤平邑治稍開豁而餘皆山勢峭峻石壁嵯  
峨中通一路層磴九折間有河岍隙地而廣不過百步  
恰如我 國松京之青石洞曉自禮部脩送十三車而  
俱裝以蘆葦各駕五馬禮部郎中滿人叙陞阿護行灤  
平至燕京每邑定公館供盤飧並如義州例○灤平縣  
唐為奚王府西省地遼置北安州興化軍屬中京金為  
興州寧朔軍元仍曰興州屬上都路俗稱大興州明洪  
武間常遇春敗也速於全寧進攻大興州敗其守兵踰  
新開嶺克開平遂以興州屬北平府後改為興州左右

中前後五衛永樂初移衛入內地而興州為朶顏界清  
初為喀喇河屯乾隆丙申陞為灤平縣隸承德府

二十二日庚子晴踰黃土嶺青石嶺炊飯于兩間房渡潮

河止宿于古北口之潮河川營城是日行八十里由常

山峪西南行五里為黃土梁子

七溝有黃土梁子此又  
有黃土梁子起北俗通

稱嶺脊曰  
黃土梁子

嶺下有烟臺撥汛地名馬圈子

馬圈子凡三  
見亦起撥汛

之通

由黃土梁子西南行七里為青石嶺鑿石開道峻

險甚於廣仁由青石嶺西南行十八里有烟臺撥汛地

名三間房由三間房西南行十里有行宮獵圍地名兩

間房由兩間房西南行二十里有烟臺撥汛地名馬圈  
子由馬圈子西南行十二里為巴克什營有行宮由巴  
克什營西南行八里為古北口之潮河川營城西北距  
潮河僅百餘步絕河為柵橋通北門夾關東西皆四稜  
山巖泰尊長城逶迤于岡脊明時敵臺星羅于峰巔氣  
勢雄豪形勝奇壯實南北之大防而華夷之大界也關  
內間井市廛櫛比繁華亞於平泉義州自兩間房西南  
山麓漸低坪野漸開山復合而坪復盡凡五遭然後始  
成古北口自潮河營以外屬灤平縣界以內屬密雲縣



界○潮河川營明置潮河川守禦千戶所清設潮河川  
把總駐守城週六里有六關門北門三中城東門一南  
門二並無樓提督營駐劄城內統轄本標及馬蘭泰寧  
宣化天津等四鎮而受節制於直隸總督本標中營中  
軍叅將一中軍守備一千總二把總四兵八百六名左  
營游擊一中軍守備一千總二把總四兵八百六名右  
營游擊一中軍守備一千總二把總四兵八百六名古  
北口城守營都司一千總一把總二兵二百四十七名  
○潮河發源于古北口西北三百里郭家屯西古開平

南境西去灤河源僅數十里水經注所謂鮑邱水出灤  
夷北塞中是也東南行歷山谷中自古北口西流入密  
雲縣界折而西南至縣治西南與白河會水勢悍急響  
如潮到○亭林顧炎武曰古北口北三里為潮河川守  
禦千戶所有關元史中統二年帝親將諸萬戶漢軍及  
武衛軍繇檀順州駐潮河川者是也潮河自塞外興州  
發源入古北口西南經密雲懷柔至牛欄山與白河合  
其寬處可一二里狹處僅二三丈以巨木為柵縱橫布  
石以限戎馬此漢郎中侯應所謂木柴僵落谿谷水門

者然水性湍急大雨則諸崖之水奔騰而下漂木走石

當歲歲修治川之兩旁葺垣立臺東臺下有鐵門關為

出入道常扃鑰不開而臺上有樓廢今總督大臣以撫賞

涖焉關外為夾牆撫夷魚貫而前受賞於關下軍士列

兩山

四稜山東西麓

上伐鼓吹角以震讐之下有小城曰北關

營二門而川口東南有小城曰潮河川堡亦二門守脩

一人守之臺之東西因山為城參差曲折千里不絕其

衝處則建空心敵臺高或三四丈廣或十四五丈凡衝

處或四五十步一臺緩處或二百步一臺每臺百總一



人主殺敵臺頭副二人主輜重五臺一把總十臺一千  
總皆以南兵充之每一二里鈴柝相聞為一墩每墩軍  
五人主瞭望每路傳烽官一人有警舉烽左右分傳數  
百里皆見應速而脩豫故鮮失亡大抵皆戚少保繼光  
之遺畫也○登潮河川營城有詩曰車馬逶迤大漠秋  
白檀南望是神州燕雲樹色連天盡宣大河聲入塞流  
異代秋山春水感幾人秦月漢關愁邊城兒女無情緒  
滿挿生花上砲樓又曰綠山古堞勢猶雄天作重關路  
不窮行過熱河千里塞明臺復上夕陽中又曰四稜山

下走潮河漢卽秋風出塞歌第一關防稱古北戚公方  
略問如何

二十三日辛丑晴踰火石嶺渡潮河炊飯于石匣城止宿  
于密雲縣城內是日行一百里自潮河川營南行二里  
為火石嶺南開坪野潮河經之自火石嶺南行三里為  
古北口南天門而城在嶺脊兩崖壁立崕岬險峻僅通  
一車南天門東有大悲菴地界高爽鍾魚潔淨前對黑  
松五峰諸山奇峰秀岫拱揖環抱恰如我 國松京之  
天摩闕菴外華表扁曰洛迦仙境清聖祖御筆也菴東

為攬勝軒內揭今皇上御製御筆詩版詩簇菴西為神  
武鎮即南天門樓少憩菴內住持僧進茶饋以清心元  
二凡凡關口例有稅惟古北口商賈出入不征稅聖祖  
所定也口外則每二十里或三十里置烟臺及撥汛口  
內則每五里或七八里置烟臺及撥汛由潮河川營南  
行五里為古北口南天門撥汛又五里為稻黃店撥汛  
又五里為新開嶺撥汛又五里為北白河間撥汛又五  
里為南白河間撥汛又七里為腰亭鋪撥汛有行宮又  
八里為石匣城撥汛城西平地有石如匣深不可斷故



以名城北有新相臺舊相臺城內有官府民戶市廛又  
四里為山安口撥汎又四里為化家店撥汎又七里為  
望都嶺撥汎又五里為朝都庄撥汎又五里為大石橋  
撥汎有行宮又七里為九松山撥汎又八里為穆家峪  
撥汎又八里為石嶺子撥汎又四里為沙峪溝撥汎又  
八里為密雲縣撥汎有行宮縣治在白河東一里白檀  
山北二十里官府市廛之雄麗繁華與遼陽相埒蓋自  
潮河川營至石匣城為四十里自石匣城至密雲縣城  
為六十里古北口以內地勢愈南愈低踰嶺隘則必有

坪野過坪野則又有嶺隘凡五六遭而為密雲縣治恰  
如我國漢都之楊鐵坪塞外諸峯峭峻秀麗向燕京  
犇馳恰如我國之三角山始知天造地設將真帝王  
億萬年丕基則文明特拔之形局理應與之彷彿也○  
古北口明洪武間置古北口守禦千戶所後改為密雲  
後衛領左右中前後五千戶所嘉靖間改設叅將駐守  
清順治初改為都司康熙間設提督為重鎮駐劄潮河  
川營城內古北口舊城在山上週四里三百一十步門  
三今皆頽廢有南天一門及門左右雉堞而已○石匣

城在密雲新城東北六十里亦名石匣營城週四里二百六十四步三尺門四弘治十七年甃葺隆慶間設總兵游擊等官駐守今古北口提督前營駐劄城內游擊一中軍守脩一千摠二把摠三兵四百七十三名○密雲縣漢為白檀縣三國志曹公歷白檀破烏丸於柳城是也後魏皇始間置密雲郡治提携城領密雲要陽白檀三縣北齊廢密雲郡及要陽白檀二縣入密雲縣隋開皇間以密雲燕樂二縣置檀州唐天寶間改為密雲郡乾元間復為檀州遼為檀州武威軍領密雲行唐二



縣宋宣和間賜名橫山郡陞鎮遠軍節度金以密雲縣  
屬順州元復為檀州隸大都路明洪武間改為密雲縣  
屬順天府正德初屬昌平州清初復屬順天府密雲城  
池有新舊舊城明洪武中輒葺週九里二百三十八步  
門三新城萬曆中輒葺週六里一百九十八步門三新  
舊二城相距五十步連兩端外皆有濠清康熙間以霧  
靈山水衝壞城底就城西開河四百六十餘丈引水歸  
入白河又葺護城石堤八百餘丈城守營都司一把總  
一兵二百五十八名○霧靈山在密雲東北一百八十

里一名萬花臺高峻為諸山之冠山上常有雲霧籠之  
登其絕頂可瞰口內四稜山在密雲東北一百里峯巒  
秀拔皆方正有稜黑松山在密雲北少東七十里相傳  
元時有黑松林今無五峯山在密雲東北八十里五峯  
聳列如指亦名五指山密雲山在縣南二十里一名橫  
山石虎攻段遼遼棄令支奔密雲山即此白檀山在縣  
南二十里與懷柔縣接界縣名密雲白檀以有兩山也  
黍谷山在縣西南十五里劉向別錄燕有黍谷地美而  
寒不生五穀鄒子居之吹律而溫氣至鄒子名衍燕昭

王所師號談天行者也銀冶山在縣南十五里舊產銀  
鑛宋王曾上契丹事順州東北過白嶼河望銀冶山即  
此白河在縣西源出宣化府赤城縣自古北口西流入  
遼縣城西又南逕懷柔縣東又南逕順義縣東至通州  
北又東南流逕州東又南逕故漷縣東又逕香河縣西  
南又東南逕武清縣東又東南入天津縣界由直沽入  
海古名沽水亦名潞水今稱北運河盖白河會潮沽榆  
沙通惠諸河勢如建瓴而西北諸山泉流滙聚伏秋積  
雨易致衝決康熙間決武清縣筐兒港聖祖臨視令於



決處建減水石壩二十丈開引河夾長堤注之壩河渡  
由賈家沽洩入海雍正間怡賢親王奏請北運河歸通  
水道統轄宜於河西務設同知楊村設通判以專防修  
遂拓籌筐兒港舊壩六十丈重濬引河改籌長堤又就  
河西務上流青龍灣建壩四十丈開引河注之七里海  
導七里海達之北塘口運道乃安陽河在縣東北七十  
里源出司馬臺關口泉南流西折貫古北營城中西出  
又南入潮河○亭林顧炎武曰自石匣東北行十里為  
腰亭舖始入山又十里為新開嶺又十里為老王店金

史貞祐二年潮河溢漂古北口鐵衆門闕至老王谷者  
此也又十二里至古北口水淺則絕潮河水大則紆迴  
從山頂行故石匣至古北口計程為六十里也古北口  
自唐始名唐書檀州燕樂縣有東軍北口二守捉北口  
長城口也金史古北口國言曰留斡嶺元史古北口千  
戶所於檀州北面東口置司唐莊宗之取幽州也遣劉  
光濟克古北口遼太祖之取山南也先下古北口金之  
滅遼希尹大破遼兵於古北口其取燕京也蒲覓敗宋  
兵於古北口元文宗之立也唐其勢屯古北口撒敦追

上都兵於古北口禿堅帖木兒之入也太子出光熙門  
東走古北口本朝嘉靖間俺荅之犯京師也入古北口  
故中居庸山海而制其阨塞者古北喜峰二口焉按亭  
林謂石匣東北四十二里為古北口又三里為潮河川  
營城此以潮河營為在古北口外而與余所覩合其自  
石匣城計程與今相差不過五里俞清一統志誤以古  
北口為距密雲東北一百二十里而潮河營則實距密  
雲東北一百里是錯看亭林水大時紆迴之計程而潮  
河營反在古北口內與今關防形勢判異恐非細失也



二十四日壬寅晴炊飯于懷柔縣止宿于南石槽是日行  
七十里出密雲城南門西行一里即白河絕河為橋聯  
皇途以葦葛編成長圓體徑可四五尺長可二三丈中  
實沙石作橋柱上架大木鋪蘆葦以上塗之左右為朱  
漆欄干護之河岍又繫御舟一全體皆黃忝上設金頂  
黃屋津船數十又在御舟傍又西九里為十里浦撥汎  
又西十里為標園庄撥汎密雲縣界止此懷柔縣界始  
此又西五里為駙馬庄撥汎又西十里為王化庄撥汎  
又西五里為懷柔縣撥汎懷柔縣治在潮河西二十二

里白河西七里清初縣民鍾白河之濚鑿渠引之統城  
盤旋如帶境內瘠土自後遂成水田甯渠曰寶帶城內  
官府民戶市廛雖不及密雲之宏麗而亦足稱繁華地  
有行宮又西十五里為黃花路橋子撥汎又西十五里  
為南石槽有行宮石槽有三曰東石槽南石槽北石槽  
元史上都兵掠石槽燕鐵木兒遣撒敦掩其不備蹂之  
即此到懷柔城內寓館見一白首貴官進轎將發問之  
即閭老嵇璜也嵇是漢人而以文詞有盛名於天下年  
今八十餘進揖請安嵇曰何如是過禮俺為接駕已喫

飯忙向口外恨不得從容也後于圓明園宴退又過嵇  
於勤政殿門外嵇先問余安且道懷柔城內暫見事可  
知其聰記之不衰也老人艱步處處坐休吏部尚書彭  
元瑞輒扶掖而行或是門生座主歟自密雲以後留京  
諸王貝勒文武大臣之為接駕向口外者絡繹於途或  
乘金銀頂坐轎或乘簷笠太平車前導後護多為五六  
十騎少亦數十騎到石槽舉燭後回回國從臣二人來  
訪蓋以在熱河時從臣等隨烏什王出入宴班與余頗  
熟而向燕起程又同日也從臣等不解漢語又不能識



字無以酬酢只勸茶數巡各贈清心元五九扇五柄舉  
手稱謝而去○懷柔縣漢漁陽縣地唐初為密雲昌平  
二縣地貞觀中置彈汗州開元間改曰歸順州治懷柔  
縣天寶初改曰歸化郡乾元初復為歸順州遼廢州以  
縣屬順州宋宣和中因之金明昌間改曰溫陽元廢明  
洪武間復置懷柔縣屬北平府後改屬順天府正德初  
改屬昌平州清初復屬順天府懷柔城池明洪武十四  
年土築成化三年甃磚石弘治十五年改築週四里六  
十步門三城守營都司一把總一兵一百十四名○牛

欄山在縣西北十里山上有洞俗言有金牛出焉至今  
洞前石壁為小槽形名曰飲牛池宋王曾上契丹事曰  
順州至檀州漸入山牛欄當其要路者即此山之東麓  
潮白二河會焉紅螺山在縣北二十里山下有潭相傳  
潭中有二紅螺大如斗出則光燄燭林王曾上契丹事  
順州東北有螺盤山即此石塘山在縣西三里採石以  
供欄柱堦砌之用明時設工部廠今廢龍王山在縣西  
半里舊城環其上下有龍潭深不可測

二十五日癸卯曉雷雨日出後晴午後又霎時雷雨即晴

炊飯于清河站達皇京入南館暫憩仍向圓明園是日  
行七十六里由南石槽南行十二里懷柔縣界止此順  
義縣界始此又南行十三里為蘭溝站有行宮前有蘭  
溝河又南行三十里為昌平州界千壽山距此百里以  
內皇明十三陵在焉永樂五年皇后徐氏崩上命禮部  
尚書趙珪率明地理者廖均卿等往擇地得吉於昌平  
縣東黃土山及車駕臨視封其山為千壽山作長陵自  
是列聖皆兆於長陵之左右而同為一域又南行三里  
為清河站河出玉泉山東會沙河入白河絕河為石橋



統石欄永樂中建宣德五年上奉皇太后謁長陵獻陵  
上躬橐鞬騎導皇太后輦至清河橋下騎扶輦既度橋  
上復乘郊甸之民夾道羅拜皆稱萬歲自密雲至清河  
山漸遙低野愈遼濶平途如砥夾以榆柳清明廣大之  
光景還勝於山海關內外惟民戶之稠密繁華不如通  
州以西朝陽門以東又南行十里為土城關元舊也正  
統十四年也先奉上皇登土城以通政司左參議王復  
為右通政中書舍人趙榮為太常寺少卿出見上皇於  
土城即此地長安客話都城德勝門外有土城關相傳

古薊門遺址亦曰薊邱京師八景之薊門烟樹即此按  
土城關俗稱省連坡今城廢土阜東西相對林木翳翳  
蒼翠乾隆丙申建小亭短碣于東阜以存薊邱古蹟又  
南行八里渡京城北濠石橋鋪石皇道始此廣可三間  
由德勝門入京城由地安門入皇城出東安門歷東華  
門東長安門到南館即正陽門內也德勝門元之健德  
門明洪武元年大將軍徐達改今名到鳳凰城邊門落  
後之幕裨譯官及從人等已於二十四日來接館中余  
暫憇後首譯洪命福來傳安南王及從臣南掌緬甸使

臣皆不入京城直向圓明園和王兩中堂之指揮如此  
云日已向曠門鑰將下遂與正使書狀騎而出正陽門  
聞外城西便門已開投宿於宣武門外閤舍城門則日  
暮而閉天明而開宮門則初更而開攢點而開云自熱  
河至京城德勝門凡四百二十六里○京城規制內城  
週四十里南面廣二千二百九十五丈九尺三寸北二  
千二百三十二丈四尺五寸東長一千七百八十六丈  
九尺三寸西一千五百六十四丈五尺二寸下石上甃  
共高三丈五尺五寸堞高五尺八寸趾厚六丈二尺頂



濶五丈門樓九均朱楹丹雘檐三層封檐列脊用綠琉璃角樓四均四面甃垣設礮牕城闌九皆有譙樓閤樓制如角樓水關七皆內外三重護以鐵柵九門正南曰正陽南左曰崇文南右曰宣武北之東曰安定北之西曰德勝東之北曰東直東之南曰朝陽西之北曰西直西之南曰阜城鼓樓在皇城地安門北鍾樓在鼓樓北均趾高一丈二尺廣十六丈七尺有奇縱減三之一上建樓柱枕椽題悉制以石外城環內城南面轉包東西角樓週二十八里南面廣二千四百五十四丈四尺七

寸東長一千八十五丈一尺西一千九十三丈二尺下  
石上甃共高三丈堞高四尺趾厚二丈頂濶一丈四尺

門樓七角樓六城闌五

東西便門  
無城闌

水關三制皆如內城

七門正南曰永定南左曰左安南右曰右安東曰廣渠

西曰廣寧東隅曰東便西隅曰西便內城明永樂七年

勦建外城嘉靖三十二年勦建內城濠河發源玉泉山

經高梁橋至城西北分二支一循城北轉東折而南一

循城西轉南折而東環繞九門經九牐匯流至大通橋

而東悉砌甃石於兩岍正陽門外石梁三餘八門各跨

一梁外城濠河亦自玉泉山分流至西角樓遠城南流  
折而東至東角樓環遠七門東達運河門外各跨一梁  
○都城街道凡十六內城曰崇文街曰宣武街曰安定  
街曰德勝街曰地安街均南北為衢曰朝陽街曰阜成  
街曰東直街曰西直街均東西為衢外城曰正陽街曰  
崇文街曰宣武街曰左安街曰右安街均南北為衢曰  
廣寧街曰廣渠街均東西為衢內外城坊二十四在正  
陽門外正陽橋者以橋名坊即琉璃廠朝陽門外達東郊曰  
壇神路者曰景升阜成門外達西郊月壇神路者曰光



恒安定門外達北郊方澤壇者曰廣厚東西長安街均  
以街名坊大清門東曰敷文西曰振武崇文門內曰乾  
日宣武門內曰瞻雲東大市街南北均以街名坊東曰  
履仁西曰行義西大市街與東大市街同太學東西皆  
曰成賢府學東西皆曰育賢帝王廟東西皆曰景德○  
園丘在正陽門外南郊方澤在安定門外北郊太廟在  
闕左社壇在闕右朝日壇在朝陽門外東郊夕月壇在  
阜成門外西郊先師廟在安定門內太學左堂子在長  
安左門外東南

皇上御製癸卯集註曰我國家典禮家  
重堂子祭天自世祖定鼎建堂於京

師每歲元朝率王公大臣先詣堂于行禮歷代遵行又  
有國俗立堂于拜天必以敬之句據此堂于即祭天之  
所而東人或謂之鄧將軍廟蓋遼陽城南有弘治間都  
指揮使鄧佐祠素著靈異遼人畏服遼陽即天命東京  
故傳會  
之也

宗人府吏部戶部禮部兵部工部翰林院鴻臚  
寺欽天監太醫院在長安左門外刑部都察院通政使  
司大理寺太常寺鑾儀衛在長安右門外理藩院詹事  
府在御河橋東順天府國子監在安定門內光祿寺在  
東安門內太僕寺在正陽門內東四譯館在正陽門外  
提督九門步軍統領署在地安門外凡壇廟皆覆黃琉璃  
公舍皆覆甌瓦

閤舍禁  
甌瓦

○內城八旗方位鑲黃旗在

安定門內正黃旗在德勝門內並屬北方正白旗在東  
直門內鑲白旗在朝陽門內並屬東方正紅旗在西直  
門內鑲紅旗在阜成門內並屬西方正藍旗在崇文門  
內鑲藍旗在宣武門內並屬南方鑲黃正白鑲白正藍  
為左翼四旗自北而東自東而南正黃正紅鑲紅鑲藍  
為右翼四旗自北而西自西而南四周星拱環衛宸居  
內城九門八旗班直每門城門領二門千總二城門吏  
二驍騎二百六十名礮手十八名外城七門八旗班直  
每門城門領一門千總二城門吏一驍騎礮手共七十



名又設提督翼尉協尉等官統轄八旗步軍按旗畫界

環衛皇宮防守城門皆順治元年所定也○清太祖辛

丑以滿洲人衆編為正黃正白正紅正藍四旗甲寅以

滿洲蒙古漢軍諸衆增設鑲黃鑲白鑲紅鑲藍四旗合

為八旗有都統

清字固山額貞

副都統

清字梅勒章京

參領

清字甲佐喇章京

領

清字牛永章京

等官統率八旗騎兵雍正二年設圓明園八

旗護軍營環衛禁苑有營總參領等官統率護軍三千

八百名以大臣管轄乾隆十四年設健銳營于香山實

勝寺傍習雲梯馬步射鳥鎗駕舡駛風諸技有翼領參

領等官統率八旗勇健子弟二千名亦以大臣管轄○  
古北口防守尉所屬四旗滿洲領催十二驍騎百八十  
八名山海關副都統所屬八旗滿洲蒙古漢軍領催四  
十前鋒四十烏槍驍騎二百名驍騎四百四十名礮手  
八十名熱河副都統所屬八旗滿洲蒙古委前鋒校八  
前鋒九十二領催百烏槍驍騎五百名驍騎千二百名  
礮手四十名凡山海關內畿輔駐防有五鎮營兵馬又  
有八旗兵馬山海關外盛京地方駐防但有八旗兵馬  
二十六日甲辰晴由宣武門外遵城底出外城之西便門

歷內城之阜成門到西直門外向西行二十里入圓明園寓館自圓明園達皇城御途皆鋪石廣可三間夾途左右綵棚聯亘奇巖異樹畫閣牌樓形形色色不可窮詰比之熱河沿途之點綴殆百倍也觀光士女填咽街巷車轂相掣馬不得穿過真天下壯觀也○圓明園世宗潛邸時聖祖賜園在西直門外二十里南距海淀八里宮城週二十里有東西南門皆三間各門外左右皆安石獅前繞拒馬木形如义字朱漆南門扁曰圓明園即世宗御筆也南門拒馬木外東西各有池縱濶皆數百步南



為鋪石皇道西池之西岍東池之東岍皆闌闌過二池  
皇道折而東夾道左右皆市廛王公大臣亭榭開廟佛  
宇多在西池之南岍彩瓦雕牆綿亘十里以達海淀賜  
春園余之寓館在西池南岍衡衡內水關之北每夜卧  
聽灘聲亦一清致皇上御製記曰昔我皇考因皇祖之  
賜園脩而葺之畧具朝署之規以乘時行令布政親賢  
而軒墀亭榭凸山凹池之紛列於後者不尚其華尚其  
樸不稱其富稱其幽樂蕃植則有灌木叢花怒生笑迎  
也驗農桑則有田廬蔬圃量雨較晴也松風水月入襟

懷而妙道自生也細旃廣廈時接儒臣研經史以淑情  
也或怡悅於斯或歌詠於斯或惕息於斯我皇考之先  
憂後樂一皇祖之先憂後樂周宇物而圓明也圓明之  
義蓋君子之時中也皇祖以是名賜皇考皇考敬受之  
而身心以晶戶牖以銘也不求自安而期萬方之寧謚  
不面自逸而冀百族之恬熙則又我皇考綏履垂裕於  
無窮也予小子敬奉先帝宮室苑囿常恐貽羞敢有所  
增益是以踐阼後所司以建園請卻之既釋服爰仍皇  
考之舊園而居焉夫帝王臨朝視政之暇必有遊觀曠

覽之地然得其宜適以養性而陶情失其宜適以玩物  
而喪志宮室服御奇技玩好之念切則親賢納諫勤政  
愛民之念踈矣其害可勝言哉我皇考未就暢春園而  
居者以有此圓明園也而不斷不雕一皇祖淳樸之心  
然規模之宏敞邱壑之幽深風土草木之清佳高樓邃  
室之具備亦可稱觀止實天寶地靈之區帝王豫遊之  
地無以踰此後世子孫必不舍此而重費民力以創建  
苑囿斯則深契朕法皇考勤儉之心以為心矣

燕行紀卷二





